


2



ARTICLES

DE RESTABLISSEMENT

ET R'APPEL DES IESVITES

en France, en l'an 1603.

*Avec l'Arrest contre-eux rendu par la Cour
le 23. Decembre 1611.*



A PARIS,

Par FRANÇOIS DV CARROY, Imprimeur
& Libraire, rue Dauphine.

M. D C. XII.

Case


F

39

1326

1612582

THE NEWBERRY
LIBRARY



ARTICLES

DE RESTABLISSEMENT

ET R'APPEL DES IESVITES EN
France, avec l'Arrest rendu contre
eux par la Cour, le 23. Decembre
1611.



EN RY PAR LA GRACE
DE DIEV ROY DE FRAN-
CE ET DE NAVARRE.

A tous presens & aduenir, Sa-
lut, sçauoir faisons que desirans satis-
faire à la priere qui nous a esté faite par
nostre sainct pere le Pape, pour le resta-
blissement des Iesuites en cestuy nostre
Royaume, & pour aucunes bonnes &
grandes considerations à ce nous mou-
uans. Nous auons accordé ces presen-
tes, pour ce signées de nostre main, &

de nostre grace speciale , pleine puissance , & autorité Royale , à toute la Societé & Cōpagnie des Iesuites , qu'ils puissent , & leur soit loisible de demeurer & resider és lieux où ils se trouuerōt à present establis en nostre Royaume , à sçauoir és villes de Tholoze , Agen , Rhode , Londem , Perigueux , Limoges , Tournon , le Pois , Aubenat , Bezieres ; Et outre lesdits lieux , Nous leur auons en faueur de sadite saincteté , & pour la singuliere affectiō que nous luy portons , encor accordé & permis de se mettre & reestablis en nos villes de Lyon , Dijon , & particulierement en nostre maison de la Flesche en Anjou , pour y continuer & establis leur residence , aux charges , toutesfois , & conditions qui ensuiuent.

i Premièrement , Qu'ils ne pourront dresser aucuns Colleges , ny residence en aucune ville & endroiēt de cestuy nostre Royaume , pays , terres , & sei-

gneuries de nostre obeïssance sinon de nostre expresse permission, sur peine d'estre décheus du contenu en ceste nostre presente grace.

2- Que tous ceux de ladite Societé estās en nostredit Royaume ensemble leurs Recteurs & Prouiseurs seront naturels François, sans qu'aucun estrangier puisse estre admis & auoir lieu en leurs Colleges & residences sans nostredite permission. Et si aucuns y en a de present, seront tenus dedans trois mois apres la publication de ces presentes se retirer en leurs pays, declarant que nous n'entendons comprendre en ce mot d'estranger les habitans de la ville & Compté d'Avignon.

3- Que ceux de ladite Societé auront ordinairement pres de nous vn d'entre eux qui sera suffisammēt authorisé parmy eux, pour nous seruir de Predicateur, & nous respondre des actions de leurs Compagnies, aux occasions qui se

présenteront.

4 Que tous ceux qui sont à présent en nostre Royaume, & qui seront cy apres receuz en ladite Societé ferôt serment par deuant nos officiers des lieux, de ne rien faire ny entreprendre contre nostre seruice, paix publique, & repos de nostre Royaume, sans aucune exception ny reservation: dont nosdits officiers enuoyeront les actes & procez verbaux és mains de nostre tres cher & feal Chancelier; & où aucuns d'eux, tant de ceux qui sont à présent, que de ceux qui suruiendront seroiēt refusans de faire ledit serment, seront contraincts de sortir hors nostre Royaume.

5 Que cy apres tous ceux de ladite Societé tant ceux qui ont fait les simples vœux seulemēt, que les autres, ne pourront acquerir dans nostre Royaume aucuns biens meubles, par achapt, donation ou autrement sans nostre permission.

6 Ne pourront aussi prendre ny recevoir aucune succession soit directe ou collaterale, non plus que les autres Religieux: & neantmoins au cas que cy apres ils fussent congediez & licenciiez par ladite Compagnie, pourront r'entrer en leurs droits comme auparauant.

7 Ne pourront prendre ny recevoir aucuns biens immeubles de ceux qui entreront doresnauant en leur Societé, ains seront reseruez à leurs heritiers ou à ceux en faueur desquels ils en auront disposé auant que d'y entrer.

8 Seront aussi subiects en tout & par tout aux Loix de nostre Royaume & iusticiables de nos Officiers au cas & ainsi que les autres Ecclesiastiques & Religieux y sont subiets.

9 Ne pourront aussi ceux de ladicte compagnie entreprendre ne faire aucune chose tant au spirituel qu'au temporel au preiudice des Euesques, Chappitres, Curez, & Vniuersitez de nostre

Royaume, ny des autres Religieux, ains se conformeront au droict commun.

10 Ne pourront pareillement prescher, administrer les saincts Sacrements, ny mesme celuy de la Confession à autres personnes que celles de leur Societé, si ce n'est par la permission des Euesques, Diocesains des Parlements où ils sont establis, sçauoir est à Bordeaux & Dijon, sans toutesfois que ladicte permission se puisse entédre pour le Parlemēt de Paris: fors & excepté les villes de Lyó & la Fleche, ausquelles il leur est permis de resider & exercer leurs fonctions cōmeés autres lieux qui leurs sont accordez.

11 Et afin que ceux de ladicte Societé qui sont à present reestablis ayēt moyen de se pouuoir entretenir & viure en leurs Colleges & residences, nous leurs auons permis & permettons de iouyr de leurs rentes & fondations presentes & passees: & au cas que sur icelles eussēt esté

esté faictes aucunes saisies, plaine & entiere mainleuee leur en sera faite.

Si donnons en mandement à nos amez & feaux les gens tenās nostre Cour de Parlement que ces presentes ils verifient, facent lire, publier & enregistrer, & du contenu en icelle iouyr & vser pleinement ladite Compagnie & Societé des Iesuites, cessans & faisans cesser tous troubles & empeschemens au contraire. Car tel est nostre plaisir. Et afin que ce soit chose ferme & stable à tousiours, nous auons faict mettre nostre seal à ces presentes: Sauf en autres choses nostre droict & l'autrui en toutes. Donné à Rouen au mois de Septembre l'an de grace 1603. & de nostre Regne le 15. Ainsi signé HENRY. Et plus bas, Par le Roy, Ruzé. Et seellé du grand sceau de cire verte, en lacs de soye.

Registré. Ony le Procureur General du Roy, après tres-humbles remonstrances faites ausdits Seigneurs. A Paris en Parlement le 2. Iannier 1604. Signé VOISIN.

*Lettres de Jussion pour la verification des
susdits Articles.*

HENRY par la grace de Dieu, Roy
de France & de Navarre. A nos
Amez & feaux Conseillers les Gens te-
nans nostre Cour de Parlement à Paris,
Salut. Nous auons dés le mois dernier
fait expedier nos lettres Patentes en for-
me d'edit, pour le reſtabliſſement des
Ieſuites en aucuns lieux & endroits de
noſtre Royaume, à certaines charges &
conditions y mentionnees. Au lieu de
proceder à la verification deſquelles,
ſelon noſtre volonte, vous vous ſeriez
contentez de faire des remonſtrances
que nous auons meſmement conſide-
rees, & ſur icelles aſſis le iugement, que
l'on peut prendre de perſonnes du tout
pouſſees d'une bonne & ſincere affe-
ction. Mais nous auons de noſtre coſte
des raiſons ſi pregnantes, qu'elles ne ſe
doibuent en aucune façon debattre.

Nous voyós mieux que nul autre quelle route nous deuons tenir , & depuis qu'il a pleu à Dieu nous donner la grace que nous ayons preserué ce vaisseau des orages & tempestes passees : Nous en voulons encores manier le timon, pour le conduire heureusement, moyénant sa diuine puissance. Nous ne nous sommes embarquez sur ce reſtablissement , que sur de tres-bonnes & fortes cósiderations, desquelles nous ne pouuons nous departir ſans vn tres-notable intereſt & preiudice au bié de ceſt Eſtat. A ces cauſes, nous voulons, vous mandons, & tres-expreſſement enioignons par ces preſétes ſignées de noſtre main propre, qu'incontinent & toutes affaires ceſſantes, vous ayez à entrer à la verification pure & ſimple de noſdites lettres d'Edit, ſelon leur forme & teneur, ſans plus y uſer d'aucun refus, lógueur, modification, ny difficulté, & ſans attendre de nous autre plus expreſ com-

mandemēt, ny de bouche, ny par escrit
 que cesdites Presentes, lesquelles vous
 seruiront de premiere, seconde & final-
 le lussion que pourriez attendre de
 nous, sans vous arrester aux raisons qui
 vous ont meu à nous faire lesdites Re-
 monstrāces, & qui vous pourroiet mou-
 uoir à nous en faire encores, lesquelles
 nous tenons pour toutes entendues: &
 nonobstant icelles, & sans y auoir es-
 gard, voulons que vous ayez à passer
 outre à ladite verification. Car tel est
 nostre plaisir. Donné à Paris le 27. De-
 cembre, l'An de grace 1603. & de nostre
 Regne le 15. signé HENRY. Et plus bas,
 Par le Roy, Ruzé, & seellé sur simple
 queue de cire iaulne du grand seel.

REGISTRE.

*Ouy le Procureur General du Roy, apres tres. humbles Re-
 monstrances faites ausdits Seigneurs. De Parlo en Parlement
 le 2. Ianuier 1604.*

Signé

VOISIN.

Arrest de la Cour de de Parlement de Paris.]

ENTRE les Prebſtres Eſcolliers du College de Clermont, eux diſans Jeſuites, Demandeurs à l'entherinement de Lettres Patentes du Roy, du vingtiesme Aouſt Mil ſix cens dix, de Permiſſion de faire Leçons publiques en toutes ſortes de Sciences & autres Exercices audit College de Clermont, obſervans par eux les regles de l'Edict du mois de Septembre Mil ſix cens trois, & autres Declarations & Reglemens faicts depuis, & Deffendeurs d'une part. Et les Recteur, Doyen, Procureurs & Suppoſts de l'Univerſité de Paris, Oppoſans à l'entherinement des ſuſdites Lettres, & Demandeurs en Requeſte du deuxiesme Decembre Mil ſix cens onze, à ce que conformément à l'Edit du Reſtabliſſement des Demandeurs, & Arrest de verification, que deſſenſes leur ſoyent faites de faire aucune exercice & fonctions ſcholastiſques, d'autre part, Sans que les qualitez puiſſent preiudicier.



A COVR sur l'entherinement des lettres appointe les les parties au Conseil, corrigeront leurs plaidoyez, y adiousteront tout ce que bon leur semblera dans huietaine, produiront, bailleront contredits & saluations dans le temps de l'ordonnance, & à ouyr droict, Ordonne que le Prouincial & ceux de sa cōpagnie demandeurs qui l'assistent à l'audience, louscriront presentemēt la submission faicte par ledit Prouincial d'eux cōformer à la doctrine de l'escole de Sorbonne, mesme en ce qui concerne la conseruation de la personne sacree des Roys, manutention de leur autorité Royale, & liberté de l'Eglise Gallicane de tout temps, & ancienneté gardee & obseruee en ce Royaume. Pour le tout veu & communiqué au Procureur General du Roy, & joinct à l'appoincté au Conseil, faire droict aux

parties ainsi que de raisou. Cependant
faict & fait inhibitions & deffenses aux
demandeurs de rien innouer faire &
entreprendre contre & au preiudice des
lettres de leur restablissement, & de l'Ar-
rest de verification d'icelles, s'entremet-
tre par eux ou personnes interposées de
l'instruction de la jeunesse en ceste vil-
le de Paris en quelque façon que ce
soit, & faire aucun exercice & fonction
de scholarité à peine de descheance du
restablissement qui leur a esté accordé,
despens reseruez. Prononcé le 23. De-
cembre 1611.

P. N. V. A. B.

LE

Dup

Nat. entol. p. 6

FRANC ET

VERITABLE DISCOVERS

AV ROY:

SVR LE RESTABLISSEMENT

qui luy est demandé pour les Iesuites.

Reuillon Quirin

1750

—

Am...
—

M. DC. II.

TEOKA


dup

not cataloged


Handwritten signature or name

Handwritten text

Handwritten text



LE FRANC ET VERITA-
ble discours au Roy? sur le reſtabliſſement
qui luy eſt demandé pour les Ieſuites.



SIRE, Il eſt difficile que ſur tant de prieres qui vous ſont faites de pluſieurs endroiçts pour les Ieſuites : & ſur tant de raiſons auſſi qui vous ſont alleguees au contraire , voſtre eſprit ne ſoit diuerſement agité.

J'AY eſtimé que voſtre Majeſté ſeroit ſoulagée de voir en bref ce que ie me ſuis propoſé de part & d'autre, laiſſant pluſieurs conſiderations de peu de conſequence, & ne m'arreſtant qu'à celles qui ſont peſantes, & qui peuuent toucher l'eſprit d'un grand Roy, en matiere tres-importante, & où il eſt neceſſaire de ſe reſouldre promptement.

LA verité eſt donc, **S**IRE, qu'en remettant les Ieſuites, vous donnerez beaucoup de contentement à un bon nombre de Catholiques de voſtre Royaume, qui les eſtiment utiles pour retrancher les opinions nouuelles en la Religion : & par meſme moyen vous obligerez la plus grande partie de Meſſieurs les Cardinaux, qui les affectionnent pour beaucoup de raiſons : & meſmes d'autāt qu'ils ſupportent de grands travaux pour eſtendre & la

4

foy Catholique, & la puissance de sa Sainteté par toute la terre. Gens actifs, diligens, soigneux & courageux, auxquels la chaise a beaucoup d'obligation: ils sont venus en vne saison pleine de difficultez.

VOILA, SIRE, les grandes & principales raisons qui vous peuuent mouuoir d'un costé: Car ce qu'on vous allegue de l'instruction de la ieunesse, est peu considerable: d'autant qu'avec verité, tout bien balancé ils ont, plus tost nuit que profité aux lettres. Et en voici la raison en vn mot.

AUPARAVANT qu'ils fussent venus en France, tous les beaux esprits, tous les enfans de bon lieu estudioient en l'Vniuersité de Paris, où il y auoit tousiours vingt ou trente mil escholiers, tant François que Estrangers. Cette grande multitude y attiroit tous les plus doctes & plus celebres hommes de l'Europe, soit pour paroistre, soit pour profiter. Les places de Lecteurs publics instituees par le Roy François premier, estoient recherchées & retenues dix ans auparauant par les lumieres des lettres. En la seule Sale de Cambray se faisoient lors de plus belles & plus doctes leçons en vn mois, que depuis par toute l'Vniuersité en vn an, compris les Iesuites. Qui ont trouué moien des'establir petit à petit en toutes les meilleures villes du Royaume: & en ce faisant, ont coupé les sources d'où venoit cette grande multitude d'escholiers: & par mesme moien ont faict cesser vn autre grand bien, qui aduenoit à la ieunesse estudiant à Paris, laquelle se ciuiliisoit d'auantage en la langue Françoisse,

5
& aux mœurs, & en affection enuers le general del'Estat, qu'elle n'a faict depuis, ne sortant point des Prouinces.

IL Y A encore vne raison remarquee par l'Vniuersité de Padoüe, se plaignant d'eux à la Seigneurie de Venise en quatre vingts & vnze, lors qu'on leur fit defenses de lire à autres qu'à eux mesmes: C'est que leur principale estude estant la Theologie, ils ne laissent ordinairement en toutes leurs classes (excepté la premiere) que de ieunes hommes qui s'apprennent plustost qu'ils n'enseignent. De sorte que les enfans demeurans ainsi iusques à quinze ou seize ans entre les mains de gens peu scauans, ne deuiennent gueres grand personages; aussi nous voions qu'il y en a peu qui paroissent aux Compagnies. Cela se recognot clairement en quatre vingts quatorze, lors que l'Vniuersité de Paris presenta sa requeste contr'eux: ils chercherent quelque habile Aduocat de leurs escholiers pour les defendre (ce qui leur eust aucunement serui:) Ils trouuerent assez de gens instituez par eux, & de tous aages: mais nul capable de soustenir vne grande cause, & leur fallut auoir recours à vn tres-bon Aduocat, mais qui n'auoit iamais rien appris d'eux. Ils forment les leur plustost à la contemplation, qu'à l'estude & à l'action. Entre les Medecins, qui est vne fort scauante faculté, on voit peu de leurs escholiers qui reluisent. Quant aux lettres humaines, & le secret des langues, ils s'y addonnent encores moins. Et à la verité, leur vraye profession est la Theologie, c'est leur talent, leur

Marathon, ils y sont fort versez, ils choisissent de bonne heure des esprits esueillez & aigus : ceux qui tombent entre leurs mains, ne leur eschappent gueres : c'est vn meslange de diuerses nations, ils s'entraident, & conferent leurs estudes. En fin, il faut que chacun confesse qu'ils excellent aux disputes sur cette science, la Roine des autres.

Q V A N D ie dis qu'ils ne sçauent point le secret des langues, ce n'est pas pour denier que parmy eux il ne se trouue des hommes de sçauoir mediocre aux lettres humaines : mais i'entens qu'il n'y faut pas aller chercher des gens semblables à ces quatre gloire des Gaules, Rois des lettres, tels recognus & confessez par tout le monde, dont trois viuent, & le quatriesme encores par sa meilleure partie.

T O V S les Iesuites qui furent iamais, à grande peine meriteroient-ils le nom de disciples de l'vn de ces quatre : & m'asseure que ceux qui sçauent quelque chose entre-eux, le recognoistront ainsi. Mais ils respondront, qu'ils ne s'y sont pas addonnez, & que leur principal but est la Theologie, & diront vray.

E N C O R E S, doit-on remarquer, que ceux qui parmi eux ont quelque sçauoir notable, ne s'amusent plus à enseigner les enfans. Car ils s'addoient aussi tost à l'estude de la Theologie, où estans aydez du labeur des plus grâds personnages d'entr'eux, ils se mettent à escrire : & faut confesser qu'ils profitent grandement en la defense de nostre Religion Catholique, contre les escrits de nos aduersaires. Et parmi ce grand nombre il s'en est trouué vn

ou deux qui ont la diction belle, le styl hardy, les mouuemens esleuez, la disposition bonne, & mille belles poinctes. En fin, si ie suis capable d'en iuger, les requestes qu'ils ont presentees à vostre Majesté, sont deux belles pieces; & ausquelles tout ce que les grands maistres en cet art ont enseigné, se trouue curieusement obserué. Certes leur cause ne pouuoit estre mieux defendüe.

O R Q V E ce grand trauail en l'estude de la Theologie n'ait aigri contr'eux ceux de la Religion pretendüe reformee, il n'en faut point douter: Mais aussi qu'il n'y ait beaucoup de choses en leurs actions, voire en leur doctrine, qui les font hayr par de tres-grands Catholiques, qui ne leur cedent rien en deuotion, cela ne se peut dénier. Je ne parlerai que, d'un poinct (car il ne faut pas abuser de l'audience d'un si grand Prince :) mais certes cetrui-ci la merite, si autre chose quelconque, puis qu'il y va de tout.

S I R E, entre les Sorbonistes, il s'en est trouué quelquesfois, mais peu & rarement, qui se laissans persuader aux raisons colorees de ceux qui ont faict à Rome des discours sur la puissance des clefs, ont voulu mettre en auant, que les Papes pouuoient excommunier les Rois, & desliers leurs subiects du serment de fidelité: Mais sur l'heure telles propositions (comme schismatiques) ont esté condamnées par le corps de Sorbone, authorisé de toute l'Eglise Gallicane, & par les Arrests de vostre Parlement, qui ont esté les deux grands boucliers de vos predecesseurs contre les entreprises

qu'on a voulu faire.

IL SE trouue d'ordinaire (comme à present) de tresbons Papes, & fort enclins à favoriser la France, en souuenance des grandes obligations qu'à le saint Siege à vostre couronne, SIRE: Mais il s'en eslit aussi quelquefois qui panchét du tout du costé d'Espagne.

QUAND ce malheur aduient, si les François croioient que leur Roy peust estre legitimement excommunié, & eux deliurez du serment de fidelité, la verité est, que nos Rois courtoient grâde fortune de se voir despoüillez de leur Estat: & en effect, ils n'auroient plus qu'un Empire precare, c'est à dire, qui dependroit de la bone ou mauuaise grace de celui qui seroit esleu par messieurs les Cardinaux: entre lesquels y en a tousiours bon nombre qui tiennent de tresgrands benefices au Milanois, au Roiaume de Naples, & encores en Espagne. Cela ne seroit plus estre Roi, mais Viceroy? Roi de nom, & en effect Lieutenant general? tels qu'estoient ces Rois auxquels les Romains donnoient & ostoient les sceptres quand bon leur sembloit. Aussi tous ceux qui ont vescu depuis le Christianisme en ce Roiaume, ont reietté vne telle proposition, comme la plus dangereuse qui puisse estre mise dans les esprits du peuple, & la plus contraire à la parolle de Dieu, qui a dict, *Mon regne n'est point de ce monde.* Surquoi S. Aug. 1. *Escoutez*

1. August.
tract. 115.

*Audite Iudaei
& Gentes,
audi prepu-
rium, audite
omnia regna*

Iuifs & Gentils, escoutez tous regnes terriens, ie n'empesche point vostre domination en ce monde
Et dans S. Luc 2. *Quelqu'un de la troupe lui dit? Maistre, di à mon frere qu'il face partage avec*

9

terrena, non impedit dominacionem vestram in hoc mundo.

2. S. Lucas 12. At quidam de turba, Magister dei fratri meo ut diducat mecum hereditatem. At ille dicit ei: Homo quis me constituit indicem aut diuisorem super vos?

3. D. Bernard. lib. 1. de consid. Non monstrabunt puto qui hoc dicent, ubi aliquando quispiam Apostolorum sederit, index hominum, aut diuisor terminorum, aut distributor terrarum. Stetisse denique lego Apostolos indicandos, sedisse indicantes non lego. Erat illud, non fuit.

moi de nostre succession. Et il lui respondit? Homme, qui est-ce qui m'a establi iuge ou partageur entre vous? Sur quoi S. Bernard 3. au liu. 1. de la consideration: Ceux qui disent cela, ne scauroient monstrier que iamaïs aucun des Apostres se soit assis comme iuge des hommes, ou partageur, ou distributeur des terres. Bref, nous lisons bien que les Apostres ont esté iugez par d'autres: mais qu'ils se soient assis pour iuger les autres, nous ne lisons point. CELA SERA, MAIS IL N'A POINT ESTÉ.

SVR lesquelles raisons indubitables, & infinies autres que i'obmets pour abbreger, la Sorbone a tousiours decidé, & avec elle toute l'Eglise Gallicane; Que c'estoit vne proposition schismatique, que le Pape eust puissance d'excommunier nos Rois, ny de rien entreprendre sur leurs Majestez tres-Chrestiennes. Et Iean Tanquerel en l'an 1561. fut condamné par Arrest du Parlement, à faire amende honorable, & demander pardon au Roy, pour auoir osé mettre cette proposition en ses theses, encores qu'il declarast que ce n'auoit esté que par forme de dispute, & peu s'en fallut qu'il ne fust condamné à mort: bien luy prit que le Roy n'auoit qu'vnze ans: s'il en eust eu seulement quatorze, il ne fust iamaïs eschappé.

10
L'A y dict que la Sorbonne auoit tousiours
condamné cette proposition, ie l'entens ius-
ques à ce que les peres Iesuites ont eu instruit
plusieurs escholiers aux leçons qu'ils faisoient
continuellement en Theologie. Car à la veri-
té, en quatre vingts & neuf, lors que l'excom-
munication contre le feu Roy fut apportee,
& qu'on proposa en la Sorbone, sçauoir si le
Pape auoit ce pouuoir : Aussi tost les vieils
Docteurs Faber Syndic, le Camus, Chabor,
Faber Cure de S. Paul, Chauagnac, & tous les
autres anciens & de la bonne paste, y resiste-
rent vertueusement. Mais la partie estoit bien
faicte : car tous les ieunes qui auoient estudié
en Theologie aux Iesuites, Boucher, Pichenat,
Varadier, Semelle, Cully, Aubour, & infinis
autres, l'emporterent à la pluralité des voix,
contre la parole de Dieu, & toutes les maxi-
mes de France.

A v s s i que ce ne soit l'opinion des Iesui-
tes, que le Pape peut excommunier les Rois,
deliurer leurs subiects du serment de fidelité, &
leur oster leurs sceptres, leurs couronnes &
leur Estat, cela ne peut estre denié: veu qu'a-
près que l'Vniuersité de Paris leur eut obiecté
cette dangereuse doctrine, tant s'en faut qu'ils
l'aient deniee, qu'au contraire en leurs defen-
ses composees par l'aduis commun de toute
leur societé, & à loisir en l'an 1595. intitulees,
*La verité defendue contre le plaidoié d'Antoine
Arnauld*, en la pag. 70. ils vsent de ces propres
mots, *Tu n'auois que faire de prouuer que les
Rois sont ou doiuent estre seuls seigneurs temporels
en leurs Roiaumes, veu que le Pape, comme i'ay*

dict, ne pretend rien en cette souueraineté, sauf à
 radresser comme pere, VOIRE ENCORES
 IVGE, ceux qui seroient pernicious à l'Eglise.
 Car alors non seulement il peut, mais aussi il doit
 se monstrier LEVR SUPERIEVR, pour leur
 bien & celui du public. Ce sauf te met en auertin
 & te fait rechner, si faut-il l'aualler, & confesser
 au surplus, que tu n'as ni raison ni conscience. Car
 premierement cela est utile aux Princes, qui bien
 souuent sont retenus, ou ramenez aux denoirs, plu-
 tost PAR LA CRAINTE DV TEMPO-
 REL qu'ils aiment tousiours, encores qu'ils soient
 mauuais, que du spirituel, duquel ils ne se soucient
 s'ils n'ont bonne conscience, ce qui n'aduiet pas
 tousiours. C'est pourquoy Dieu menaçoit les Rois
 d'Israël plustost de leur OSTER LEVR ROI-
 AVME TEMPOREL, s'ils ne gardoient sa loi,
 que de les priner de la vie eternelle: ET EN FIT
 LA PRATIQUE AV FIN PREMIER, A
 QVI IL OSTA LE SCEPTRE.

ET D'AVTANT, SIRE, qu'ils voient
 que toutes les maximes de l'Eglise Gallicane,
 & tous les Arrests de vostre Parlement, sont
 directement contraires à cette doctrine si pe-
 rilleuse, laquelle ils mettent petit à petit dans
 les esprits du peuple qui en estoit ancienne-
 ment si esloigné: ils sont contraints d'en ve-
 nir-là, de dire que les histoires que nous ap-
 portons de nos Rois, sont exemples de rebel-
 lion, en ces mots: Tu es si mal sage & si mauuais
 François, que de vouloir tirer des exemples DE
 REBELLION des histoires de France, ternissant
 la splendeur de nos Rois & de nostre mere com-
 muné, &c. Et enuiron 2. pag. apres? En un Roi

Pag. 64.

65. & 66.

de la 1. in

pression de

leurs defen

conceues so

le tilt. de la tout y est grand, soit vertu ou vice: & s'il emploie
 merit. defend. sa puissance à mal faire, il ne peut estre arresté que
 Et en la der- par une grand' puissance, Et partant voyons-nous
 uere impres- auoir esté prattiqué l'usage de ce glaive en la per-
 ion de lettre sonne de plusieurs Rois & plusieurs Royaumes: &
 venue à la si la prattique n'a tousiours esté profitable, elle la
 ag. 49. 50. peu tousiours estre, Si LES SVBIECTS FVSSSENT
 1. ESTE BIEN DISPOSEZ. Il n'y eut iamais rien
 plus clairement escrit, & n'y eut aussi iamais
 rien au monde plus directement contraire à la
 parole de Dieu qui veut que quand il nous en-
 uoie de bons Rois, nous le remercions, quand
 il nous en enuoie de mauuais, que nous l'en-
 louions encores, & croions qu'il le fait pour
 le mieux, afin que nous aimions moins le mō-
 de, & que nous en sortions plus allegrement.
 C'est Dieu seul qui establit les Rois, c'est luy
 seul qui les peut oster en les tirant à luy, quand
 bon luy semble. Les clefs qu'il a baillées à S.
 Pierre & ses successeurs nos saincts Peres, ne
 concernent que le Royaume des cieux, & nul-
 lement ceux de la terre: luy mesmes qui pou-
 uoit tout quand il a esté ici bas, ne s'est point
 meslé de chastier les Rois, ni de briser leurs
 couronnes, au contraire toute sa vie n'a esté
 qu'un liure ouuert d'humilité, & n'a donné à
 ses Apostres autres armes pour establisir sa loy:
 il leur a dit, Les Rois des nations les dominant, &
 ceux qui vsent d'autorité sur icelles sont appellez
 bien-faicteurs, mais il ne sera pas ainsi de vous.
 Dieu n'a point voulu que S. Pierre ni ses suc-
 cesseurs nos SS. Peres entreprissent plus que
 luy: * aussi les premiers ne l'ont pas faict. Si
 d'autres y contreuient, ils abusent en cela

ag. 51. de
 impression
 venue, &
 7. de la
 roffe.

Luc. 1.
 Pierre ep.
 c. 2.

Luc 22.

S. Bern. au
 en ent.

de leur pouuoir, & ne doiuent estre escoutez. *Itane immi-*
 L'Eglise Gallicane l'a tousiours ainsi iugé, & a *nutor est di-*
 excommunié ceux qui disoient le contraire, *gnitatis ser-*
 comme auteurs d'une fiere & tres-malheu- *uus, si non*
 reuse doctrine, laquelle voulant rendre les *vult esse ma-*
 hommes pies par impieté, cause tousiours un *ior domino*
 monde de meurtres, d'incendis, de rauissemens *suo: am disci-*
 de femmes & de filles, & desolations de villes *pulus si non*
 & prouinces entieres. C'est l'abyssine des abyf- *vult esse ma-*
 mes, & la mer des abominations: nous l'auons *ior eo qui se*
 senti iusques à l'extremité, & neantmoins les *miser?*
 Iesuites s'opiniaistrent de plus en plus: & si
 nous les croyons, les Bulles de Rome peuuent
 despoüiller tous les Rois de la terre, Et LEVR
 OSTER LEVR TEMPOREL, ET LEVR SCEPTRE.

A QVOI aussi est conforme ce que monsieur *1. canto. 3.*
 Bellarmin Iesuite, à present Cardinal, escrit sur *lib. 5. c. 6. p.*
 ce subiect, *Quant aux personnes: Le Pape comme*
Pape, ne peut ordinairement déposer les Princes
temporels (encores qu'il y ait iuste cause) en la fa-
çon qu'il dépose les Euesques, c'est à dire comme
iuge ordinaire: Et toutesfois il peut, comme souue-
rain Prince spirituel, si cela est necessaire pour le
salut des ames, CHANGER LES ROIAUMES, LES
 OSTER A L'VN LES DONNER A L'AVTRE, *ainsi*
que nous le prouuerons. Et au chap. 8. pour preu-
 ue il apporte toutes entreprises violentes dire-
 ctement opposées à la parole de Dieu, & de-
 testées par toutes les histoires: la suite desquel-
 les nous montre que le grand establisement
 de l'Empire Mahometan vient des guerres in-
 testines & furieuses entre les Chrestiens, en-
 gendrées par telles vsurpations, qui ont fait
 baigner l'Europe dans le sang de ses propres

lib. 5. c. 6. p.
1081. de
l'impression
de l'an 1601.

enfants, tant du costé del' Orient, que de l'Occident. S. Ambroise se garda bien de penser seulement à toucher au sceptre, à la couronne, au temporel, ny à deliurer sujet quelconque du serment de fidelité. Comme aussi ne l'eust-il peu sans contreuenir directement aux commandemens de Dieu. Ce fut seulement vne admonition viue, pour faire cognoistre vne tres-grande faute.

Belarmin 1.
controu. 3. li.

25 c. 7.

Et les Iesuites

pa. 42. de

menue Im-

pression de

leurs defences

concenes sous

ultre de veri-

té defendue.

ESTANT fort à remarquer, que le mesme sieur Belarmin & les mesmes Iesuites en leursdites defences soustiennent & s'efforcent de confirmer l'Extrauagante commune, *Vnam sanctam, de maiōritate & obedientia*, cōdamnee en France. Or par ceste Extrauagante, si le Pape s'abuse, se desuoye, & entreprend plus qu'il ne doit, les hommes neantmoins sont tenus d'obeir, & Dieu seul le peut iuger. De sorte qu'encores qu'un Pape avec toute l'iniustice du monde fulminast vn Roi, comme nous l'auons veu pratiquer en 89. contre nostre deffunct maistre, tres-grand Catholique, neantmoins par la doctrine des Iesuites, personne du monde ne peut prendre cognoissance de cause: elle leur est interdite, & reservee à Dieu seul: Et cependant il faut que ce Roy, au veu de tous ses subiects, voire par eux-mesmes, soit despoillē de son Estat & de sa Couronne, & qu'en sa place entre quiconque il plaist à cette supreme puissance d'y establir, suiuant ces mots dudit sieur Belarmin, *CHANGER LES ROYAUMES, LES OSTER A L'VN, ET LES DONNER A L'AUTRE*, qui sont les mesmes termes de Tanquerel, *Regno & dignitatibus priuare potest.*

condainnez par ce celebre Arrest. Et encores Tanquerel n'auoit pas esté si hardi, de dire que le Pape pouuoit donner à vn autre, ce qu'il auoit osté.

LE DIT sieur Belarmin Iesuite passe plus outre. Car il tranche net, que tous les Ecclesiastiques de vostre Royaume, ne sont plus vos subiects. Ce qui est aussi directement contraire à la parole expresse de Dieu, & au maximes de l'Eglise Gallicane, que le surplus de ce qui a esté dit. Et neantmoins il se soustient hardiment, & avec pures cauillations s'efforce de renuerfer ces paroles de S. Paul: *Que toute personne soit subiette aux puissances superieures: Car il n'y a point de puissance sinon de par Dieu, & les puissances qui sont en estat, sont ordonnées de Dieu.* Parquoy qui resiste à la puissance, resiste à l'ordonnance de Dieu. Et apres: *Partant il faut estre subiets non seulement pour eniter leur ire, MAIS* AVSSI POUR LA CONSCIENCE. Car pour cette mesme cause vous payez les tributs: d'autant qu'iceux sont ministres de Dieu, s'employans à cela. Sur quoy S. Iean Chrysostome remarque que ces paroles sont dictes non seulement pour les Laics, mais aussi pour les Clercs, pour les Religieux, voire pour les Apostres mesmes. Et encores veut le mesme sieur Belarmin eluder ces paroles de S. Pierre: *Doncques rendez vous subiects à tout ordre humain, pour l'amour de Dieu: soit au Roy, comme au plus esleué; soit aux Gouverneurs, comme enuoiez de par luy.* Et entre autres choses, le dit sieur Belarmin dict: *En ce temps-là il estoit fort necessaire d'aduertir diligemment les Chrestiens qu'ils obeissent aux*

*Au traicté
De Exem-
ptione cleri-
corum, im-
primé avec
celuy des In-
dulgences.
1599.*

*Epist. ad
Rom. cap. 13.*

*ὁ σαῖ ἐξ ὁ-
σῶς.*

*ἐμὸν οὐδὲ
τὴν ὀργὴν
ἀλλὰ καὶ
διὰ τὴν
σωτηρίαν.*

*Epist. 1. c. 2.
ὑποτάγη-
τε ὧν πά-
ση ἀνθρώ-
πων κτί-
σει.*

*Rois, de peur que la Predication de la foi ne fust
empeschée. Ce qui seroit faire de nostre Reli-
gion Chrestienne vne Religion de pipeurs,
vne Religion de Renars qui au commence-
ment vinssent dire : Nostre regne n'est point de
ce monde, nous obeissons tous, & Ecclesiastiques
& autres, aux Rois, aux Gouverneurs : Et puis
quand ils seroient au dessus du vent, & qu'ils
auroient eniambé l'auctorité, qui vinssent a-
lors tenir vn langage tout contraire, & s'attri-
buer arrogamment ce que Dieu tout-puif-
sant s'est reserué à luy seul, sur les Rois d'Israël
& tous autres. Voila à la verité, la vraie doctri-
ne Iesuïte : voila leurs ruses, voila le chemin
qu'ils tiennent pour s'insinuer dans les Estats :
mais c'est toute autre chose de la Religion
Chrestienne, laquelle parle tousiours franche-
ment, veritablement, sans deguïsement, sans
fard, sans feintise : & ne distraict ni enleue
subiect quelconque à son Prince, ainsi que
faict la doctrine Iesuïte. Car en fin, voici la
conclusion dudit sieur Belarmin, en la page
271. de ce mesme traicté des exemptions :
*Mais tu diras, Ce seroit faire tort aux Princes,
si contre leur gré ils estoient priuez de leur droit
qu'ils auoient sur les clerics auant qu'ils eussent pris
clericature. A quoy ie respons, qu'on ne leur faict
aucun tort, d'autant que celui qui vse de son droit,
ne fait tort à personne. Or celui-la vse de son
droit, qui choisit l'estat qu'il estime luy estre le
plus conuenable, COMBIEN QUE PAR AC-
CIDENT IL S'ENSUIVE QUE LE PRIN-
CE SOIT PRIVE DE SON SVBIECT. Ce
n'est point marchander, c'est le tracher court,**

Bel-
com-
s c.
Et l-
pa-
me
pre-
len-
con-
rili-
te

& dire à vostre Majesté en vn mot; Qu'autant qu'il y a d'Ecclesiastiques en France, autant il y a de subiects du Pape. Et de faict, en la page 255. il vse de ces mots; *Le Pape a osté tous les Ecclesiastiques de la subiection de leurs Princes seculiers: dont il s'ensuit qu'en ce qui concerne les personnes Ecclesiastiques, ils ne sont point Princes souverains, &c.* Qui est, en bon François, bastir vn autre Estat dans vostre Estat, SIRE, & vn autre Roiaume dans vostre Roiaume. Et de faict, pour prouuer ceste doctrine, qui est directement opposée à la foi Chrestienne, en ce mesme endroit il faict vn argument *à simili*, Page 255. & dit que c'est tout ainsi que si vn Roi assubiectionnoit à vn autre, vne partie de son Roiaume, & en ce faisant, par le droit de guerre, ou par autre iuste titre, perdrait partie de son Estat. Et dit fort vrai, quel'establisement de sa maxime est plus dangereuse pour les Princes, que la perte d'vne grande iournee, ou d'vne grande Prouince. Car le mal est d'as les entrailles, & ceux qui sont desia perdus, attirent souvent les autres par leurs confessions secretes, à renuerser la Monarchie sous laquelle ils sont nais. Que s'ils sont contraincts quelquefois de Page 258. du-
dit traité de
exemptione. recognoistre les Magistrats, ils dient que c'est par force, qu'il faut caler voile, mais que cela ne fait consequence: ce que nous deuons bien remarquer. Et disent en outre, que les ordonnances des Rois, encores qu'il n'y ait rien de contraire à l'Ecriture, ni aux Canons & saincts Decrets, neantmoins n'obligent les gens d'Eglise que *ad directionem, non ad coactionem*. Ce sont leurs propres mots en la page 269. qui est

ce qu'ils dient apres, page 271. que les clerics ne sont plus subiets du Prince temporel, & qu'il les perd. Côme à la verité il est bien sans doute, que celui-là n'est plus subiect, qui ne peut plus estre contrainct d'obeir aux loix.

Ces heresies auoient esté autrefois du tout deracinees de vostre France, SIRE, mais en voici qui les viennent resemer abondamment, & ont eu l'artifice de faire glisser ce traicté parmi celui des Indulgences, ils l'ont fourré dans la presse, afin qu'on n'y prist point garde. Or de ceste proposition, que les Ecclesiastiques ne sont plus subiets, voici vne merueilleuse consequence, c'est qu'ils pourroient entreprendre contre leur Roi, sans crime de leize Majesté. Et voici cette consequence couchee en termes precis dans les aphorismes des cōfesseurs, composez par le Iesuite Emanuel Sa, sur le mot *Clericus*. *La rebellion d'un clerc contre le Roi, n'est pas crime de leize Majesté, d'autant qu'il n'est plus subiect du Roi.*

S. Pierre
Epist. 1. c. 2.

Rex potest per

romp. priua-

ri ob tyranni-

dem, & si nō

faciat officii

suum & cum

est causa ali-

qua iusta &

eligi alius à

maiori parte

populi

Qui dam ta-

men solam ty-

rannidē cau-

sam putant.

Et sur le mot *Princeps*, ils font encores plus clairement cognoistre combien ils sont contraires à la parole de Dieu, qui veut qu'on supporte les mauuais Princes establis dans le thronne de leurs ancestres, comme estans donnez de sa main. Car voici comme ils en parlent, *Vn Roi peut estre priné par la Republique, à cause de Tyrannie, & s'il ne fait son deuoir. & quand il y a quelque autre cause iuste, & un autre Roi peut estre esleu par la plus grande partie du peuple. Quelques-uns neantmoins pensent que la tyrannie est seule cause suffisante.*

P R E M I E R E M E N T on voit la malice de

laisser en incertitude vne chose de tel poids, Dieu sçait s'ils le font à cautelle, afin de pou-
 uoir estre d'un aduis ou d'autre, selon leurs de-
 sirs & leurs desseins. En second lieu, qu'y a-il
 plus contraire à la foi Chrestienne, que de
 laisser en la liberté du peuple, de iuger du bon
 ou du mauuais gouuernement de son Prince,
 & de lui faire croire qu'en faine conscience, &
 selon Dieu, il peut le chasser ou massacrer?
 pourueu qu'ils soyent la plus grande partie de
 cet aduis. Qui est vne condition bien neces-
 saire: car s'ils estoient le moindre nombre de
 cette furieuse opinion, ils seroient en danger
 de mourir en la peine: qui seroit dommage de
 perdre des gens. **SI BIEN DISPOSEZ A**
LA DOCTRINE DES IESUITES, c'est
 à dire, à chasser leur Maistre & leur Seigneur
 de son heritage, en criant au Tyran. C'est
 pourquoi tout à la fin de ce liure, l'Inquisiteur
 d'Anuers *Pardo* en l'an 1597. dict qu'il appor-
 tera vne grande vtilité. Et Dieu sçait si plus
 grande vtilité il estimoit qu'il peust apporter à
 son maistre, que d'aider à la dissipation de vo-
 stre Couronne, avec laquelle il auoit lors la
 guerre à feu & à sang. Voici ce que les mesmes
 Iesuites en ces aphorismes des Confesseurs,
 qu'ils inculquent continuellement en l'esprit
 du peuple, adioustent sur le mot *Tyrannus*,
Celui qui gouuerne tyranniquement vn Estat **IV-**
STEMENT ACQUIS, n'en peut estre despoil-
lé, SANS VN IUGEMENT PVBLIC:
MAIS QUAND LA SENTENCE EST
DONNEE, LE PREMIER VENU PEUT

*Tyrannicè gu-
 bernans iust
 acquiritur
 dominium,
 non potest spo-
 liari sine pu-
 blico iudicio
 lata vero sen-
 tentia potest
 quisque fieri
 executor. po-
 test autem de*

poni à populo
etiam qui in-
rauit et obe-
diemiam per-
petuam, si mo-
ntus nō vult
corrigi.

ESTRE EXECVTEVR. *Que si aduerti, il
ne se corrige,* IL PEVT ESTRE DEPOSE
PAR SON PEUPLE, ENCORE QV' IL
LVI EVST FAICT SERMENT DE FI-
DELITE PERPETUELLE.

OR SI toute cette doctrine vous regarde de
prés, SIRE, c'est à vostre Majesté à le iuger:
elle n'importe pas tant à tout le monde ensem-
ble, qu'à vous seul & à vostre posterité. La Frâ-
ce est vostre heritage, que vous tenez de Dieu
seul & de vostre bonne espee. Si le monde du-
roit encores dix mil ans, & que vostre posteri-
té durast autant (comme nous le deuons espe-
rer) elle doit par raison tousiours regner sur les
François, sans que les Papes, qui se pourroient
rencontrer quelquefois ennemis de vostre
maison, ayent puissance de deslier vn seul Frâ-
çois de la fidelité qu'ils deurent à vostre li-
gnée. Mais si ces maximes se coulent parmi
nous, vostre posterité, SIRE, portera sa
Couronne, & tiendra son Sceptre aussi long
temps qu'il plaira au S. Siege, & non plus.

DE cette premiere maxime depend la se-
conde, sur laquelle ie voi tant d'escrits de part
& d'autre, & nul ne vient à point. Quelques-
uns dient, que les Iesuïtes conseillent de tuer
les Rois, cela n'est pas: ils les seruent, au con-
traire, & souuent d'affection: mais voici la
distinction. Ils croyent que ceux qui sont ex-
communiez par le Pape, ne sont plus Rois,
ains Tyrans, vous auez oui ce qu'ils en dient
sur le mot *Tyrannus*. Et de faict, si on demeure
d'accord de la premiere proposition, la secon-

de s'ensuit: Car si le Pape peut mettre la main
sur le S C E P T R E des Rois & sur leur tempo-
rel, ainsi que disent les Iesuites: il reste, sans
difficulté, que quand sa Sainteté fulminé vn
Roy, il demeure priué, il demeure particulier,
il n'est plus Roy, & s'il continuë de vouloir re-
gner, il est tyran. Quiconque demeurera d'ac-
cord de la premiere proposition, sera par for-
ce trainé à la derniere. Aussi le liuret escrit de la
propre main de Iean Guignard Iesuite, & qu'il
reconnut en plain Parlement, les deux Cham-
bres assemblees, portoit ces deux mesmes pro-
positions outrageusement escrites: Car entre
autres choses il y auoit: *Que le Neron cruel a*
esté tué par vn Clement, & le moine simulé de pes-
ché par la main d'un vrai moine. Que L'ACTE
HEROIQUE FAIT PAR IACQUES CLE-
MENT, COMME DON DV S. ESPRIT,
APPELLE DECENOM PAR NOS THEO-
LOGIENS, *a esté iustement loué par le feu Prieur*
des Iacobins Bourgoing, Confesseur & Martyr,
QUE LA COVRONNE DE FRANCE POVVOIT
ESTRE TRANSFEREE EN VNE AVTRE FAMIL-
LE QUE CELLE DE BOVRBON: *Que le Biarnoïs*
ORES QUE CONVERTI A LA FOY CATHOLI-
QUE, *seroit traicté plus doucement qu'il ne meri-*
toit, si on luy donnoit la couronne monachale en
quelque Conuent bien reformé, pour illec faire pe-
nitence de tant de maux qu'il a faicts à la France,
& remercier Dieu de ce qu'il luy auoit fait la gra-
ce de se recognoistre auant la mort. QUE SI ON NE
LE PEVT DEPOSER SANS GVERRE, QV'ON
GVERROYE, SI ON NE PEVT FAIRE LA GVER-
RE QV'ON LE FACE MOVRIR. Vostre Majesté

peut voir l'original, ceci le merite bien.

D'auantage, Ambroise Varades estoit Principal de leur College à Paris, par eux choisi, comme vn des plus gens de bien de leur ordre & est encores parmi eux en aussi grand honneur qu'il fut iamais. Et neantmoins, s'il plaist à vostre Majesté de se faire apporter le procès de Barriere, vous y lirez que ce fut Varades qui lemois d'apres l'heureuse conuersion de vostre Majesté, l'encouragea de vous aller fourrer son cousteau tranchant des deux costez, dans le ventre, & l'y obligea avec le Sacrement de l'Eucharistie, l'assurant par le Dieu viuant, qu'il ne pouuoit faire vn acte plus meritoire, & que les Anges le porteroient en Paradis. Si cela n'est veritable, Varades s'en doit iustifier: il fut quelques iours caché en ceste ville lors que vostre Majesté y entra, & puis sortit deguisé, & s'en alla à Rome, où il est honoré entre eux tout ce qui se peut. Il est bien aisé de desaduouier de bouche, mais les actions sont les plus fortes, & dementent les paroles. Varades ayant commis cet horrible & execrable forfait, vous seroit mené lié par les Iesuites, pour en faire vne punition tres-exemplaire, s'ils estoient d'autre aduis que luy. Puis qu'au contraire vous voyez qu'ils l'honorent plus que iamais, & qu'encores ils sont si hardis de le mettre entre les plus grands personnages de leur ordre, il s'ensuit que de souhait, de volonté, & d'affection, ils ont tous encouragé Barriere par l'organe de Varades, leur Principal, & que ce n'est point vn parricide particulier, mais general. Aussi est-il fondé sur leur gran-

de maxime, & de l'exécution & pratique de laquelle ils attendent le plus de louange ainsi qu'il sera dit.

M A I S où est cela qu'ils mettent encores à présent Varades entre les grands personnages de leur société? Le voici en la pag. 265. de leur dite prétendue Verité defendue, imprimée vn an apres la fuite de Varades. *Que n'ont endure plusieurs GRANDS PERSONNAGES de cette Compagnie? qui ne sçait, pour parler de nostre France, les affronts qui ont esté faits les calomnies qui ont esté dites contre Jean Maldonat, Emond Auger CLAUDE MATTHIEU, Jacques Tyrins: & maintenant contre Annibal Codret, JACQUES COMMOLET, BERNARD ROILLET AMBROISE VARADE.* Estant bon, de remarquer que ce sont là de grands martyrs, & qui ont beaucoup endure. C'est parler aussi proprement & aussi Chrestienement, que quand ils appellent persecution terrible, leur procez de 64. à Paris, qui est merueilleusement abuser de ce mot. Mais bien sera-ce parler fort proprement, si on appelle persecution de tous les bons François, les furieuses & funestes guerres que les Iesuites ont excité par tout ce Royaume.

Q U E si Barriere eust esté escholier des Iesuites, nourri & esleué en leur doctrine, difficilement eust-il accusé Varade: car ils croient damnez ceux qui descouurent à la Iustice les exhortateurs de telles entreprises. Et cette troisieme proposition s'ensuit encores de la premiere & de la seconde. Car si le Pape peut

*En l'impression en me-
me lettre.
c'est la page
198.*

*pag. 69. en
meune lettre.*

excommunier les Rois, & que ce soit bien meritoirement fait de les tuer apres la fulmination, il s'ensuit aussi qu'il faut endurer le martyre constamment, & n'estre pas cause de la mort de ceux qui ont conseillé le chemin de la vie eternelle. Ces propositions sont enchainées, & s'en vont de mesme pied.

C'EST pourquoy Chastel ne voulut en particulier accuser aucun des Iesuites, puis que croiant bien faire, ainsi qu'il le declara, il auoit resolu de vous donner de son cousteau dans la gorge: dont il s'ensuit qu'il eust creu se damner, s'il eust nommé celuy qui luy auoit montré la voie de Paradis, selon son iugement peruersti. Et neantmoins comme Dieu protecteur des Rois, tire la verité de la bouche de ceux qui la veulēt le plus celer: voici les propres mots de l'interrogatoire de Chastel, dōt vostre Majesté peut voir l'original, qui vous sera tesmoigné tres-veritable, par plus de trente de Messieurs les Presidens ou Conseillers, plus croiables mille fois que tout ce que scauroient dire les parties en leur propre cause. Enquis où il auoit appris cette Theologie nouvelle, A dict que c'estoit par la Philosophie. Interrogé s'il auoit estudié en Philosophie au College des Iesuites, A dict qu'ouy, & ce sous le pere Gueret avec lequel il auoit esté deux ans & demi. Enquis s'il n'auoit pas esté en la Chambre des Meditations, où les Iesuites introduisoient les plus grands pecheurs, qui voyoient en icelle Chambre les pourtraicts de plusieurs diables de diuerses figures espouuentables souz couleur de les reduire en vne meilleure vie pour esbranler leurs esprits, & les

pousser par telles admonitions à faire quelque grand cas, à dit qu'il auoit esté souuent en ceste chābre des Meditations. Enquis par qui il auoit esté persuadé à tuer le Roy, A dict auoir entendu en plusieurs lieux, qu'il falloit tenir pour maxime veritable, qu'il estoit loisible de tuer le Roi. & que ceux qui le disoient, l'appelloient Tyran. Enquis si les propos de tuer le Roi, n'estoient pas ordinaires aux Iesuites: A dict leur auoir ouy dire qu'il estoit loisible de tuer le Roy, et qu'il estoit hors de l'Eglise, & ne luy falloit obeir, ny le tenir pour Roy, iusques à ce qu'il fust approuué par le Pape. Derechef interrogé en la grand Chambre, Messieurs les Presidens & Conseillers d'icelle & de la Tournelle assemblez, il a fait les mesmes responses, & signamment a proposé & soustenu la maxime, Qu'il estoit loisible de tuer les Rois, mesmement le Roy regnant, lequel n'estoit en l'Eglise, ainsi qu'il disoit, parce qu'il n'estoit approuué par le Pape.

Quiconque lira les Requestes que les Iesuites vous ont presentees, SIRE, estimera que Chastel ne les a point accusez, tant ils denient hardiment la verité. Mais ie ne sçai pas quelle plus grande accusation se peut trouuer, quelle plus grande charge se peut imaginer, que d'effasciner les esprits encores tendres de la iuennesse, d'une si furieuse doctrine, qui les porte à massacrer leur Prince.

A quoi est conforme ce que nous lisons de la deposition de Guillaume Parri faite à sa mort, que Benedicto Palmio Iesuite luy auoit fait prendre la resolution de l'assassinat, & qu'en ayant communiqué avec vn Prestre

nommé Vates, il la lui desconseilla, disant qu'il seroit damné : & que voiant ceste contrariété, il alla à confesse à Annibal Codreto Iesuite, qui luy dit qu'il falloit necessairement que ce Vates fust heretique : d'autant que la vraye Eglise ne doutoit point que les Rois excommuniez par le Pape fussent tyrans, & par tant ne deussent estre tuez. Aussi le commentaire du liure appelé Sommaire des Constitutions, autrement septiesme des Decretales, en la page 308. apres auoir exalté les Iesuites tout ce qui se peut (comme à la verité ils ont de bonnes parties) en fin pour comble de leur louange, dit d'eux, *Tyrannos aggrediuntur, lolum ab agro Dominico euellunt*. Vostre Majesté peut prédre le liure en main, elle entédra bien ce latin là, ie luy en ay ouy interpreter de plus difficile. En fin, que cela ne signifie qu'ils scauent fort bien & courageusement arracher l'iuroye du champ du Seigneur, & se deffaire de ceux qui sont excommuniez à Rome, il n'y a point de doute: ils les appellent tous tyrans, de quelque religion qu'ils soient.

Et de faict, le feu Roy ne fut iamais que tres-grand Catholique: chacun le sçait assez, & les obligations particulieres que l'Eglise lui auoit neantmoins aussi tost qu'il fut excommunié à Rome, pere Commolet, pere Bernard (qu'ils exaltent encores iusques au ciel par leurs defenses ci dessus rapportees) & generalement tous les autres Iesuites ne l'appelerent iamais depuis iusques a sa mort, que Tyran, Holofernes, Moab, Neron. Ce qui est conforme à leur definition de tyran cy dessus rapportee.

A Noel 93. vostre Majesté estoit Catholique, & neantmoins dans S. Barthelemi ce mesme Commelet dit, *Il nous faut un Aod, fust-il Moine, fust-il soldat, fust-il berger, il n'importe de rien : mais il nous faut un Aod.* Et depuis, estant aduerti qu'on en informoit, il s'euada. Cela ne se peut dénier, non plus que le faict de Varades, qu'ils veulent desguiser, disant qu'à la verité Barriere luy descouurit son dessein, & qu'il luy fit response qu'il ne luy en pouuoit donner conseil, estant Prestre. Quand il n'y auroit que cela, qu'est-ce autre chose en effect, sinon luy dire: Tu le deuois faire, sans en parler d'auantage: fais en plus & dis en moins? Mais si vostre Majesté se faict apporter le procès verbal de mort de Barriere, elle trouuera que Varades, Principal des Iesuites, l'exhorta, l'anima, & l'obligea par le saint Sacrement de l'Autel, à frapper le coup promptement & courageusement. Et certes vostre Majesté ne courut iamais plus grande fortune en sa vie. Et Dieu sçait s'ils eussent fait des miracles de vostre mort, puis qu'ils en auoient si bien faict de celle du feu Roy, insultant superbement sur son tombeau, par lettres enuoyées en tous endroiets du monde, & qu'ils ont encores faict imprimer à Rome, pour plus grande brauade. Elles sont inserées dans leurs lettres solennelles & annales, en la page 305. dont voici la version, *Lemesme iour que le Roy nous faisoit chasser de Bordeaux, il fut chassé de la vie. On dit qu'il nous auoit fait mener à Saint Macaire pour nous faire esgorger là-tous, s'il rat,*

*Quo die nos
Regis edicto
Burdgala
pellebanur,
eo die Rex ip.
se qui edixe-
vita de-*

pulsus est .
 At eo copin-
 geba mur ad
 R. Macha-
 rij, vt simul
 opprimere-
 mur omnes
 (seu hoc suf-
 pitio , seu fa-
 ma tulit)
 nisi antea op-
 pressus ille v-
 rus fuisset ,
 hoc porro nū-
 ciatum cum
 esset , affli-
 xit animos
 aduersario-
 rum ,

esté esgorgé le premier. Quand ceste nouuelle fut
 venue nos ennemis se trouuerent merueilleusement
 estonnez. Ie ne fus iamais si esbahi, que quand
 ie leu cest endroict de leurs lettres. Et à la ve-
 rité, qui eust pensé que des Religieux, ny mes-
 mes des Chrestiens eussent voulu monstrier
 vne telle rage & inimitié si irreconciliable,
 voire apres la mort? La Nature nous ensei-
 gne d'auoir pitié & commiseration de nos
 ennemis, quand nous les voyons estendus
 par terre: Ils ne peuuent plus estre nos enne-
 mis, puis qu'ils ne sont plus. Mais de mettre
 les pieds sur le ventre de son Maistre, de son
 Seigneur, de son Roy, & du premier Roy de
 la Chrestienté, & là dessus chanter triomphe,
 c'est surpasser toutes les barbaries, toutes les
 inhumanitez, toutes les cruautez qui se peu-
 vent imaginer.

Il est vray, que le pauvre Prince n'a point
 senti cet outrage: aussi n'est-il pas tant faict à
 luy, qu'à vostre Majesté, SIRE, & à tous ceux
 qui portent le nom de François. Mais bien
 a-il senti asprement le poison de la Ligue, qui
 luy fut préparé par Claude Matthieu Iesuite,
 qui mourut en Italie à la fin de 88. du travail
 des voyages qu'il auoit faits cōtinuellemēt en
 Espagne, en Italie, en Suisse, en Allemagne, en
 Flâdres, depuis le deceds de feu Mōsieur; pour
 conclure, nouier, & fortifier cette grâde & hor-
 rible conspiration contre le feu Roi & toute
 la maison de Bourbon. Vostre Majesté voit
 ce que Guignard Iesuite en auoit escrit:
Que la Couronne de France pouuoit & deuoit es-

29
tre transferee à une autre famille que celle de Bourbon. Aussi ceux qui sçauent le secret de la Ligue, disent tout haut, que les peres Iesuites ont esté les vrais peres de la Ligue, & qu'ils sont coupables & responsables de la mort de tous ceux qui sont tombés dans ce grand abîme par eux ouuert.

Voici vne petite histoire qui le confirme bien clairement. On sçait quel estoit le dessein des Seize, qui par vne lettre intercepte donnoient la ville de Paris au Roi d'Espagne. Où choisirent-ils vn President de leur conseil sanglant? Ils s'en allerent droit aux Iesuites, qui leur baillerent pere Odo Pichenat. Ils le confessent par leurs defenses imprimees à Paris, mais ils disent que c'estoit pour adoucir l'humeur des Seize. Il y en a qui respondroient, que c'est ietter l'huile dans le feu, que de mettre vn Iesuite parmi des seditieux. Pour moi ie dis autrement, sçauoir que les Seize n'auoient besoin que de frein, & non d'esperon: & que le seul moien de faire reüssir leur malheureux dessein, estoit de moderer leur trop grande violence. Mais qui ne voit vne correspondance merueilleuse de ces Seize bourreaux (autrement ne les peut-on appeller, puis qu'ils ont pendu eux-mesmes le seul President du Parlement qui restoit à Paris?) qui ne voit dis-ie, vne merueilleuse correspondance des Seize avec cette societé des Iesuites, puis qu'ils vouloient estre presidez par l'vn d'eux, plustost que par aucun autre Ecclesiastique ou Lai?

A V S S I que depuis le commencement de

85. leurs maisons & à Paris, & par tout ailleurs, n'aient serui de rendez-vous à tous ceux qui ont procuré l'aduancement des affaires d'Espagne: que les paquets n'y ayent esté portez, ouuerts, distribuez: qu'ils n'eussent communication ordinaire avec l'Ambassadeur Mendosse, & ses successeurs à Paris, & avec les agens & entremetteurs des affaires du Roi Philippes en toutes les bonnes villes où ils estoient, cela est trop notoire. Qui le sçait mieux que vostre Majesté?

Il est vrai, SIRE, qu'ils dient que vous estes aujourd'hui si estroitement conioint avec le Roi d'Espagne, que cela leur doit plustost seruir que nuire: d'autant que vostre Majesté n'affectionne rien d'auantage que ceux qui aiment cordialement l'Espagnol.

C E L A se peut parauanture dire maintenant: mais à la verité, ie trouuaibien estrange, comment ils vsoient des mots que voici lors que nous estions au plus fort de la guerre contre le Roi Philippes, Car du temps de Charles ix. on ne parloit point des Espagnols qu'en fort bonne part: mais les heretiques, non en haine de la nation (car les Anglois, ou Allemans leur doiuent estre plus ennemis, ayans plus fait de mal à la France qu'autre nation) ains de la religion, ont tasché de les rendre odieux, sous couleur de l'Estat. Il me semble que c'estoit vn peu trop descourir son affection enuers les Espagnols en vn temps auquel ils massacroient les François à milliers sur la frontiere de Picardie. Encores ne se faut-il pas tant laisser emporter à vne affection & vœu commun de sa reigle, qu'on ne

pn
Ar
geb
R.
rij
opp
mu
su
piti
ma
nisi
re
ru
hoc
lia
ess
cul
ed
ru
c
r
i

Pag. 159. de
eursdites de-
enses sous le
ilire de veri-
edefendue, en
rosse lettre:
page 119.
n menue.

fe souuienne de sa naissance, & qu'on ne res-
sente quelque peu de la douleur & des miseres
de son pais : veu mesmement que c'estoyent
Catholiques qu'on esgorgeoit, de tous âges,
de tous sexes, en grand nombre, & sans aucu-
ne misericorde. C'est (ce me semble) auoir le
cœur bien dur, de parler en cette façon, de
ceux qui se baignoient au mesme temps dans
le sang des François & Catholiques. Siles Es-
pagnols portent plus de respect, d'honneur,
de reuerence : s'ils font de plus grands biens &
gratifications aux peres Iesuites: s'ils les appel-
lent Apostres, comme eux-mesmes l'escriuent,
si ne faut-il pas pour cela, parler d'eux en Fran-
ce en temps de guerre, comme en temps de
paix.

P A R la requeste qu'ils ont depuis presen-
tee à vostre Maiesté, ils se sont estendus sur ce
subiect avec liberté, & avec plus de raison, en
ces termes, *Ce qu'ils nous mettoient sus, que nous
estions Espagnols, estoit vn crime battu à la for-
ge du temps, qui estoit de bonne trampe en sa sai-
son, seulement pour le regard de la saison, c'est à
dire, quand la guerre estoit entre la France &
l'Espagne, alors c'estoit vn nom odieux, vn nom
de soupçon & de haine : maintenant que vostre
Maiesté Tres-Chrestienne a serré le nœud d'une
sainte paix avec la Maiesté Catholique, & que
le François est frere à l'Espagnol, & l'Espagnol
au François, ce crime est suranné, hors de saison,
& sans raison.*

E T neantmoins si faut-il que ie vous con-
fesse, S I R E, qu'il me semble qu'outre ce que
nous en sçauons desia trop, ces gens ici par tous

ces beaux langages, se monstrent merueilleusement engagez avec le Roi d'Espagne. Ils desireront fort de vous leuer tous soupçons, & y trauaillent avec vn artifice exquis: mais si est-ce qu'on voit bien que sur tout ils ne veulent point que vos subiects cognoissent qu'ils soient autres que tres-affectionnez du Roi Philippes, estimans que cela importe au bien de ses affaires. Ce que quand ie conioins avec l'Arrest de l'Inquisition qui cassa le decret de la Sorbone faict contr'eux en 64. ainsi qu'eux mesmes s'en vantent, & avec leur premiere fondation faite par vn Capitaine Espagnol, & encores avec ces mots qui sont en la vie d'Ignace, page 169. *Nous deuons prier & reprier Dieu nuit & iour, qu'il conserue fort long temps en toute santé & route prosperité, le Roi Catholique Philippes: lequel par son hereditaire & excellente pieté & deuotion, prudence singuliere, vigilance incroiable, (& puissance infiniment plus grande que n'eut iamais Roi au monde, sert de rampart pour la defense de la religion Catholique.)* Ce qu'il fait non seulement par ses armes, *Qui ont tousiours esté inuincibles, mais aussi par le moien de ce grand Senat de l'Inquisition, qui veille continuellement pour la Religion Catholique.* Quand ie conioins tout cela ensemble, il faut que ie vous recognoisse, **SIRE**, que si quelque malheur vous apportoit la guerre, i'apprehenderois fort que ces gens ici secrettement vous fissent en toutes façons de tres-mauuais offices. Et si en autre temps ils ne demeurent pas inutiles. Car ils aduancent tousiours la propagation de leur doctrine ci-dessus remarquee: à laquelle

laquelle ils firent cognoistre en 89. qu'ils auoient desia beaucoup traueillé & faiët de grands progres. Car si contrele Roi Henry I I. fust venu vne pareille excommunication, elle n'eust pas eu pouuoir de faire seulement branfler la moindre ville du Roiaume : mais par le moyen des peres Iesuites, & leur trauail d'environ trente annees, elle a causé la mort du fils de celuy qui ne s'en fust fait que rire, non plus que ses predecesseurs. C'est chose estrange, qu'une armee de deux cens mil hommes n'eust peu faire contre le defunct Roy : ce qu'environ deux cens Iesuites ont fait, EN DISPOSANT SES SVBIECTS: c'est à dire, en alterant tellement les esprits, que le feu s'y est pris du premier coup : Au lieu qu'auparauant la France estoit vne grande mer, dans laquelle ce tonnerre estoit aussi tost esteint que tombé.

O R à la verité, tant que vostre Maiesté & les vostres ferez bien auec les Papes, le grand effect de ceste doctrine ne se manifestera pas, & vous deuez esperer d'y estre tousiours bien, mais l'aduenir est incertain. C'est pourquoy en temps de paix vous faites diligemment traualier aux frontieres. Et il est bien difficile que le S. Siege se garantisse trois fois de rang de tomber entre les mains d'un partisan d'Espagne, tant il y en a grand nombre entre Messieurs les Cardinaux : Lors il faut que ie vous parle franchement, S I R E, & sans vous flatter. La verité est, que vostre Couronne, vostre Sceptre, vostre Regne dependoit de ce seul mot, s'il y auroit plus de vos subiects de l'opi-

mon des Iesuites, que de la contraire: si la leur preualoit, vous ne seriez plus rien: si elle estoit la plus foible, vous demeureriez le maistre: mais entore seroit-ce tousiours avec le sang & la ruine de beaucoup de vos subiects, bons & mauvais.

Et sur ce poinct vostre Maiesté peut considerer, que cette doctrine de l'excommunication nous est maintenant beaucoup plus perilleuse, que lors que nous auions des Estats & des armées en Italie: par le moien de quoi nous pouuions secourir vn Pape qu'on eust voulu forcer à faire quelque chose contre nous. Mais auourd'huy vn Viceroy de Naples, avec des partisans d'Espagne dans Rome, tiennent le pied sur la gorge des SS. Peres, qui seroyent trois fois assiegez & pris deuant que nous fussions à mi-chemin pour les secourir. Ioint que Rome n'a iamais vescu que du bled de Sicile, son grenier.

Sur tout ce que dessus est besoin de remarquer, que les Iesuites recognoissans combien cette doctrine est perilleuse pour les Princes, se gardent bien de la descouurir lors qu'ils commencent à s'insinuer & glisser dans les Estats: mais quand ils y ont pris pied ferme, alors ils la font couler petit à petit de l'vn en l'autre parmi le peuple qui n'est naturellement que trop susceptible de ce poison. Car que peut-il y auoir plus doux en beaucoup d'esprits, que d'estre desliés de la subiection à laquelle leur naissance les oblige? Le sçai bien que les habilles hommes sçauent ce beau mot d'vn Philosophe; Que d'obeir à son Roy, est la vraye &

la grande liberté, Que le droit de Nature & celui des gens nous enseignent & nous obligent de seruir & honorer le Prince sous l'Empire duquel nous auons premierement veu le Soleil, & que nul homme de dessus la terre ne nous peut dispenser de l'obeissance à laquelle Dieu nous a obligez. Mais pour vn esprit bien composé qui sera de cet aduis, il s'en trouuera trois d'autre opinion : & le mal est, qu'ordinairement les plus audacieux, hardis & entreprenans tomberont en ce precipice : & si, souuent vn petit nombre de ces gens remuans se rendrôt plus forts qu'vne multitude d'autres. Nel'auons nous pas experimenté ? Le croi fermement que lors qu'on commença à appeler le feu Roi, Tyran, dans Paris, en disant qu'il estoit excommunié par le Pape, & qu'il le falloit exterminer, il y en auoit deux fois plus qui croyoient le contraire, & qui l'eussent voulu voir bien paisible regner dans le Louure, & vne douzaine de ces mutins à la Greue : mais on s'entre-regardoit, le courage manquoit, & non la force. Ainsi dix marchans seront souuent destroussez par trois voleurs, qui les surprendront. Ceux qui demeurent dans le grand chemin, & dans l'obeissance naturelle, dorment la nuit, & s'occupent le iour à leurs affaires particulieres. Au contraire, ceux qui veulent changer de maistre, & renuerser l'Estat, s'assemblent de nuit, conspirent, se fortifient chacun iour, ils n'ont que cela à faire, ils vivent de leurs pensions secretes, & en fin oppriment les autres à l'improuiste. Qui met le premier la main aux armes, à l'aduantage

LES Iesuites donc tenans fermement ces dangereuses maximes, & les semans par tout le monde, comme il a esté monstré ci-dessus, certainement il faut que ie vous confesse, SIRE, que le peril de l'accroissement de telle doctrine me semble emporter à la balance toutes les considerations qui pourroient estre au contraire.

CAR quant à refuter les opinions nouuelles en la Religion, nous pouuons dire avec verité, que tout ainsi que durant les cinquante premieres annes les erreurs de Luther & de Calvin ont esté superbement proposees, preschées, & publiees: de mesmes depuis vingt-cinq ou trente ans elles sont magnifiquement & brauement refutees & de viuë voix, & par escrit, surpassans infiniment en profond sçauoir tout ce que les autres firent iamais. Tellement que si les auteurs de telles opinions reuenoient au monde, j'estime qu'ils s'en departiroient, trouuans tous leurs grands argumens, & dont ils faisoient tant d'estat, entièrement refutez.

Avis si nous voïõs que les premiers & plus habiles d'entr'eux se remettent chacun iour au giron de l'Eglise, dont il me semble que nous deuons tous receuoir vn meueilleux contentement. Car ces heureuses conuersions ne se font point avec les gehennes, les tourmens, & les apprehensions de la mort, à la mode de l'Inquisition d'Espagne (à laquelle & aux armes de Castilles les Iesuites attribuent la conseruation de la Religion Catholique, ainsi qu'il a esté monstré ci-dessus:) mais par le glaiue du S. Esprit, & la Parole eternelle,

qui est enfeignée doucement par nos Docteurs, Pasteurs, & bons Euesques, qui ne me semblent en rien ceder en doctrine aux peres Iesuites, encores qu'ils se seruent quelquesfois de leurs argumens, qui sont tresbons & tresforts. Et croy que nous deuons aussi soigneusement recueillir leurs liures sur les poincts controuersez en la Religion, comme reietter au loin ceux qui respandent ceste doctrine, dont nous auons parlé ci dessus.

Je vous diray bien, qu'encores que les peres Iesuites ayent quelquesfois ayde à des conversions, si est-ce qu'ils ne m'y semblent point si heureux que nos Euesques & Docteurs. Leur façon trop austere, trop esloignée du naturel du François, estonne le monde du premier coup. Ils pratiquent si souuent avec les estrangers, & se sont tellement formez au patron de leur fondateur, Espagnol de nation, qu'ils retiennent (au moins la pluspart d'entr'eux) vne trop grande seuerité en leur visage, en leur port, en leur maintien. Encores se faut il accommoder à l'humeur du malade, & luy choisir des Medecins agreables, qui veult le bien guerir. Les Iesuites ne le sont nullement aux François. Ils ont si furieusement entonné de grands blasphemes contre le feu Roy, que cela fait encores horreur. Les François ont ie ne sçay quelle inclination naturelle à aymer leur Prince, qui leur fait souleuer le cœur & tressaillir quand ils entendent qu'on parle si cruellement de leurs Rois. Je leur fis dire vn iour (car ie les ay aymez & parauanture plus que ie ne deuois) que i'estois marri de les voir

si acharnez contre vn mort : & me sembloit
que les seruices que ce pauvre Prince auoit
faicts à l'Eglise, iusques à y porter son sang &
sa vie, tant de fois, en tant de batailles, en tant
de sieges, meritoient bien de pardonner quel-
que chose à sa memoire. Ils firent response à
vn qui estoit fort leur confident, à qui i'en a-
uois parlé, qu'il y auoit de l'apparence en ce
qu'il disoit, mais que le temps requeroit cela,
qu'il falloit à ce coup establir la Religion Ca-
tholique en France, ou iamais. I'entendis bien
ce qu'ils vouloient dire, & qu'ils auoient re-
solu de rendre odieuse au peuple la Monarchie
sous laquelle il auoit vescu si long temps, & lui
faire changer de maistre, en esteignant la mai-
son de Bourbon. Et quand i'apperceu depuis
les garnisons des Castillans & Napolitains
dans Paris, ie vil le commencement de l'execu-
tion de leur response. Et ne faut point vous le
deguiser, SIRE: ie pensois bien que le ieu fust
ioué, que vostre Majesté n'entreroit iamais
dans Paris, & qu'à la longue les moindres vil-
les cederoient aux principales.

Dieu, qui a tousiours eu soin particulier de
la premiere Couronne des peuples baptisez en
son nom, en a ordonné autrement: & par vrais
miracles vous a rendu paisible de tout ce grād
Empire, malgré vos ennemis. Et pour comble
de felicité, vous a donné vne belle, genereuse
& tref-vertueuse Princeesse, & dans les dix mois
vn autre vous-mesmes, preuenant nos vœux
& nos esperances.

Le soin de ce ieune Prince, plus encores que
de vostre personne, excite vostre Majesté de

deliberer avec tresgrande maturité sur tous les importans affaires de son Estat, dont à la verité celuy-ci faict partie. Et se faut necessairement resouldre à l'un des trois aduis; ou de contenter les Iesuites, ou de les faire obeir à l'Arrest qui les bannit tous hors du Royaume, ou de laisser les choses en l'estat qu'elles sont.

Je commenceray par le dernier, d'autant qu'il semble de premier œil le plus plausible, & neantmoins c'est celuy en effect qui a le moins d'apparence; estant sans difficulté, qu'il faut remettre les Iesuites par tout, ou les faire obeir par tout. Ces bigarrures sont laides, sont perilleuses, touchent à vostre reputation, à vostre auctorité. S'il est iuste & utile de les retenir, il faut qu'ils demeurent citoiens, & non bannis: sinon, il faut qu'ils sortent, & que par leur opiniastrété ils ne monstrét point exemple de rebellion, ainsi qu'ils ont faict trop long temps. Les Lacedemoniens n'en-uoioient qu'un morceau de parchemin grand comme la moitié du petit doigt, sur l'heure il falloit executer le commandement. Il est du tout necessaire que vostre Majesté soit obeie à Bordeaux & à Thoulouse, comme à Paris, comme à Fontainebleau: vous y avez des seruiteurs, & en bon nombre. Ce que vous commanderez en Roy, en Maistre, sera executé; & n'en doutez point. Mais si les Iesuites ne vous sont utiles, ne les laissez pas enraciner d'avantage en ces deux prouinces. L'arbre que vous pouuez arracher d'une main cette année, aura besoin des deux la prochaine, & en la troisieme il y faudra le picq & la coignee.

Ce voisinage d'Espagne nous doit estre fort suspect. On les a tousiours accusez d'estre Espagnol: ils l'ont fait cognoistre par toute leurs actions: & que tant plus la plainte estoit vieille, tant plus elle estoit veritable, tant plus elle estoit iuste. On les a chassez du surplus du Roiaume, mais les voila qui se retranchent en deux prouinces voisines d'Espagne, dont ils sont venus. Quel exemple d'umilité & d'obeissance; S'il y a lieu où on les doie moins laisser fortifier, c'est sur vne frontiere esloignee de nostre Soleil, & qui s'approche de celui de Madric. Il semble que les Espagnes leur facent espaule: il semble qu'ils s'aillent là barricader contre vostre Majesté: & dire, Nous nous auez chassez de Paris & d'ailleurs, mais vous n'auetz pas les bras assez longs pour nous pousser plus auant. Cest trop. Je nescay pas comme l'entendent quelques pretendus Escheuins, autresfois leurs escholiers & cōfits en leur humeur, qui se bandent si fierement pour eux: Mais si faut-il qu'ils sçachent, qu'ils vous doiuent, SIRE, autant d'obeissance que le moindre de Paris. Il y en cela trop d'arrogance, trop de mesconnoissance. Jusques ici vostre orbité leur a esté à mespris (disoit vn ancien) faictes leur cognoistre qu'ils ont à vous obeir & à toute vostre posterité à iamais: il n'y en aura vn seul si haut monté qui ne tréble. La memoire des offenses faictes au pere, ne se perd iamais par le fils.

IL FAUT donc, SIRE, ou que les Iesuites obeissent, ou que vos Arrests soient cassez: & voila la grande deliberation.

SIRE.

SIRE, beaucoup de gens se resiouiront du premier, & beaucoup du second. Pour moi, ie n'estime point que vostre Majesté doiuë tât regarder à ce qui sera agreable aux vns ou aux autres, comme à ce qui est iuste & à ce qui est vtile. Vous ne scauriez faire en sorte, que plusieurs ne soient ioieux, & plusieurs marris. Si se faut-il refoudre, & ne flucter pas tousiours. Quelles meilleures ancrs peut-on choisir, que l'Vtilité & la Iustice qui comprend l'honneste;

QVANT à la Iustice, Dieu la mise és mains des Rois. Or vos predecesseurs, SIRE, s'en sont de toute ancienneté deschargez sur la conscience de leur Parlement des Pairs? & pour l'affluence des affaires, ils en ont institué iusques à sept autres: Mais le Parlement des Pairs a tousiours retenu cette autorité & prerogatiue (comme il estoit bien raisonnable & necessaire) qu'il decide ce qui va au general de l'Estat. Cette Compagnie est remplie de tres-grands personnages infinimēt versez en toutes sortes de matieres, & sur tout ils excellent en ce qui est de la confection & iugement des procez criminels. Car s'il y a gens au monde qui y apportent grande cognoissance de cause, c'est eux. Aussi on n'a iamais veu accusé, se sentant innocent, qui ne les ait plustost demandez pour Iuges, que tous autres. Vostre Majesté en scait quelque chose.

Or ce n'est pas depuis peu qu'ils ont ouï des plaintes contre les Iesuites. Car des l'an 1564. ils ont entendu dix Aduocats en vne seule fois plaidans contre eux: Dont celui qui parloit

pour le public, homme de bien, & seruiteur
affectionné de son Maistre, s'il y en eut iamais,
pronostica (chose estrange & esmerueillable!)
toutes les actions & deportemens que nous au-
ons depuis reconnu en eux.

Quand on a veu aduenir ce qu'il auoit pre-
ueu: Premièrement la ruine de l'Vniuersité,
qu'ils ont reduicte à trois mil escholiers, au
lieu de trente mil, ainsi qu'il a esté dit au com-
mencement: & qu'on a veu petit à petit les
subiects s'esoubstraire de l'obeissance qu'ils de-
uoient à leur Prince, & tourner la veüe vers
vn autre pole: Cela a commencé à faire fremir
vn chacun, & dire tout bas (car les Iesuites a-
uoient desia establi leur puissance, & s'estoient
rendus redoutables :) L'Aduocat du Roy du-
Mesnil nous l'auoit bien dict, nous ne l'auons
pas voulu croire; ni la Sorbone, qui au mesme
temps auoit predict que cette societé estoit
nee pour la destruction, & non pour l'edifica-
tion; qu'elle apporteroit des troubles, & nui-
roit grandement aux Princes temporels (qui
sont les propres mots de son decret.) Vostre
Majesté s'en peut faire porter l'original.

MAIS quand on a veu tout ordre de po-
lice renuersé, les freins de l'obeissance coupez,
les Magistrats emprisonnez, voire quelques
vns massacrez, & le peuple furieux, comme
Lions eschappez, feuir contre tous les gens
de bien: & lors les peres Iesuites donner cou-
rage à cette populace, & Commolet d'un co-
sté, Bernard de l'autre vomir vn monde de
blasphemes contre leur Roy, contre leur Mai-
stre: & au cōtraire, exalter & faire des Panegy-

rics du Roy d'Espagne, qu'ils figuroiēt le plus grand Monarque du monde, plus puissant, plus grand terrien que ne furēt iamais les Romains, qu'il n'auoit garde de les abandonner, qu'ils luy estoiet trop chers, qu'ils eussent seulement bon courage, & recogneussent leurs forces, que iamais secours d'hommes, d'argent, de viures ne leur manqueroit. Alors à la verité tous les gens de bien, qui auoient encore les Fleurs-de-Lis grauees dans le cœur, se sont infiniment repentis de n'auoir creu ces Cassandres, mais il n'estoit plus temps.

QVAND vostre Majesté, SIRE, eut reduit Paris en son obeissance, chacun croioit assurement, que sur l'heure vous chasseriez ces mauuais eschançons, qui auoient empoissonné grande partie de vostre peuple, & qui s'estoient si ouuertement declarez ennemis iurez du feu Roy & de vous. Mais vostre Majesté tres-prudemment voulut laisser l'affaire entre les mains de la Iustice. L'Vniuersité, qui, avec beaucoup de raison, attribuoit sa ruine particuliere aux Iesuites, outre ce qui estoit de la generale, presenta sa requeste à vostre Parlement en May 94. Les Curez de Paris firent le semblable. La cause fut plaidee, mais à huis clos, qui ne fut pas vn petit aduantage aux Iesuites. Car la pluspart de ce qu'on disoit contre eux, eust peu estre tesmoigné par l'assistance à huis ouuert, & nouuelles charges fussent venuës pendant les diuers iours que la cause fut plaidee. Aduint ce coup, que Dieu destourna de vostre gorge, & vous rempara de vos dents mesme. Personne ne douta d'ou il venoit:

sur tout, quād on sceut que c'estoit vn nour-
rison des Iesuites, qui disoit auoir appris
d'eux, *Que le Roi estoit encorés hors de l'Eglise,*
& qu'il le falloît tuer? comme il a depolé en
plein Parlement. Cette extreme & malheureu-
se resolution ne pouuoit aussi venir que de ces
fieres & farouches maximes, dont nous auōs
parlé. Telles conceptions ne croissent point
naturellement, & sur tout au cœur des Fran-
çois esloignez de l'Afrique, & qui n'auoient
point veu de monstres auant que les Iesuites y
fussent entrez. Nostre terre ne produit point
ce poison d'elle mesme, il faut necessairement
qu'il y ait esté semé.

ON VA donc en leur College, on trouue en-
tre autres choses, vn discours du Pere Gui-
gnard, tout escrit de sa propre main, qui con-
tenoit le suc & la mouelle de toute ceste do-
ctrine furieuse, sanglante, hideuse. Tout cela
estoit conforme à ce qu'on auoit preueu, mais
non creu des l'an 64. & à ce qui auoit esté tout
recentement predict. Le procès est donc plei-
nement & solemnellement instruit, les deux
Chambres assemblees. Guignard recognoist
son escriture: Chastel dict en presence de
tous Messieurs, que c'estoit le propos ordi-
naire des Iesuites, *QVE LE ROY ESTOIT EN-
CORES HORS DE L'EGLISE, BIEN QVE CATHO-
LIQVE, PUIS QVE L'EXCOMMUNICATION DV-
ROIT ENCORES, ET QV'IL LE FALLOIT TVER.*
Cela du tout conforme à l'escriture de Gui-
gnard: *Si on ne le peut deposer sans guerre, qu'on
guerroie, si on ne peut faire la guerre, qu'on le face
mourir.* Apres tout cela, SIRE, que pouuoit

rien ordonner vostre Parlement de plus doux que d'enteriner la Requeste de l'Vniuersité, dont il sembloit que Dieu par vne espece de miracle auoit luy mesme voulu estre le Iuge, descourant à nud, & neantmoins sans malheur, ce qui auoit esté dit & redit tant de fois contre ceste société, & que leurs artifices, leurs belles paroles, & leur hypocrisie auoit tousiours empesché de croire assez fermement, pour se haster de s'en deliurer.

Donc avec tresgrande cognoissance de cause, vostre Parlement de Paris donne son Arrest, par lequel ils sont bannis de tout vostre Royaume, & deffences sont faites à tous vos subjects d'enuoyer leurs enfans dehors en leurs Colleges: qui est le grand mot, & sans l'observation duquel, vostre Majesté ne peut tirer que la moitié du fruct de l'Arrest. Car ils feront tousiours tres-soigneux d'enseigner ces dangereuses maximes aux enfans qu'on leur enuoiara, & d'en charger leurs consciences de les apprendre aux autres. On vous fait entendre, SIRE, que cela ne se peut executer, que on ne scauroit empeschier les peres d'enuoyer leurs enfans hors du Royaume aux Iesuites, & neantmoins il n'y a rien au monde plus facile: qu'on ordonne seulement vne peine de mil escus pour la premiere fois, dont la moitié appartiendra au denonciateur, & qui doublera autant de fois qu'on contreniendra à l'arrest, & on n'y en verra plus vn seul. Voila pas vne chose bien difficile, pour meriter d'estre appelée impossible?

PAR autre Arrest Guignard est condamné

40
à mort. L'horreur des blasphemes contre le
feu Roy, duquel il estoit subject, & la furieuse
doctrine contre vostre vie, ne permettoient
pas qu'on luy sauuaist la sienne sans hazarder
la vostre.

Avssi ces Arrests sont trouvez si iustes & si
necessaires, qu'ils furent incontinent executez
en tous les autres ressorts, excepté celuy de
Thoulouse & celuy de Bordeaux.

Pour le regard de Thoulouze, il ne le faut
pas trouver estrange: car ils estoient encores
hors de vostre service, où ils ne furent reduits
qu'en Avril 96. Quant à Bordeaux, il y avoit
beaucoup de tres-grands Catholiques, mais
tres-grands ennemis des Espagnols & des Ie-
suites, leurs arcs-boutans, qui ne demandoient
qu'à les chasser de la Guienne, comme ils a-
voient esté du reste du Royaume. Mais les Ie-
suites soudainement aduertis de l'Arrest don-
né contr'eux, auoient, à leur mode accoustu-
mee, dressé vne grande & forte partie, par le
moyen de leurs confidens, dans les villes d'A-
gen & Perigueux, où les cendres du feu de re-
bellion estoient encores toutes chaudes. Ils fi-
rent donc former des oppositions si estranges
si horribles, qu'il n'est pas possible de se rien
imaginer de semblable, qui n'auroit point co-
gnu la plume Iesuite. Car en somme, tous les
Parlemens qui les auoient bannis, estoient des
heretiques, qui auoient forcé vostre Majesté à
faire cet Edit. Leurs propres mots sont, que *Les
ennemis de la Religion Catholique Apostolique &
Romaine ont imbu vostre Majesté de faux faicts
pour les rendre odieux & suspects à elle & à son*

*Estat. Et sans autre forme ny figure de procès, ny
entrer en aucune cognoissance de cause, les ont exi-
lez & bannis. Iamais le Parlement de France
fut il si meschamment, faussement, & calom-
nieusement dechiré & vilipendé? Ils ne se con-
tenterent pas de cela, car ils passerent outre, &
entrerent en menaces, disans par leurs reques-
tes, *Que l'Estat seroit alteré, & que tel remuement
ne pouuoit estre sans alteration.* Du temps du
Roy François I. ie ne diray point vne sembla-
ble requeste (car qui y eust seulement osé pen-
ser?) mais vn escrit qui en eust approché le
moins du monde, eust cousté la vie à quicon-
que eust esté si hardi de le presenter. Aussi tel-
le outrecuidance, telle insolence, telles braua-
des, tels outrages procedans d'eux & de leurs
escholiers infectez de leur poison, qui est de
mespriser les Princes, leurs commandemens,
& leur Senat, offenserent infiniment vos serui-
teurs, SIRE, bien resolu de faire obeir vostre
Majesté, sans laisser contreroller ses comman-
demens. Toutesfois la multitude des villes qui
estoyent encores rebelles, soustenues de celle
de Thoulouse, firent prendre conseil de pa-
tienter. On voyoit que la rage & la furie de
vos ennemis, qui auoient encores l'espee traicte
contre vous, ne pouuoient plus gueres durer,
que tout leur manquoit, & qu'apres ce seroit
chose de tres-facile executiō. Or diuerses con-
siderations, diuerses occurrences l'ont retar-
dee iusques à present. Voila, SIRE, comme les
choses se sont passees selon la verité, & sans
rien deguiser. Voila ce qui a esté iugé & or-
donné contre les Iesuites, executé en partie, &
en partie non.*

OR vostre Majesté n'ignore pas que la force des Estats consiste en la manutention & execution des Arrests des Cours souveraines. Quand il est question de les renuerser, il y faut penser beaucoup de fois. C'est vn grand ouurage? & qui a vne merueilleuse suite. Les Arrests portent vostre nom sur le front? on ne les peut violer, sans blesser la Majesté des Rois, dont les iugemens doiuent estre sans retractation, sans variation. A quoi il faut adiouster, SIRE, que parmi ces deux Chambres assemblees on ne scauroit nommer vn seul hōme qui ne soit tres-grands Catholique, sans soupçon quelconque contraire, Il y a sept ans que les Iesuites espluchent leur vie, ont ils peu encores rié alleguer contre quelqu'vn d'eux? A quel propos donc, de dire, Ceux de la nouvelle opinion nous haïssent; Cela est veritable: mais que pouuoient-ils en cette Compagnie; Aussi peu que dans le Consistoire de Rome? ie dis aussi peu.

ILs insistent neanmoins, & dient que le Parlement les haïssoit. Ie demande, pourquoi; Est-ce pource qu'ils n'auoient point esté à Tours; Comment pourroient-ils dire cela, veu que la plus grande partie de Messieurs de la Cour n'auoient bougé de Paris; Est-ce donc pource que les Iesuites sont grands Catholiques? Encores moins? puis que Messieurs de la Court le sont plus qu'eux, & sans tache d'heresie. Pourquoi est-ce donc qu'ils vous eussent porté mauuaise volonté; Certainement vous ne scauriez rien respondre qui ait la moindre couleur du monde: si vous ne dites? Ils nous haïssient.

haïssoient, d'autant que nous auions esté cause de tous les maux aduenus en France. Mais ie vous respons, que cette raison de haine n'est nullement considerable. Si Catilina eust esté apprehendé, n'eust-il donc point trouué de Iuges à Rome? Il est certain que si: & neantmoins tous les magistrats, tous les bons citoyens le tenoient pour le flambeau de la patrie, il faudroit donc establir vn nouueau Parlement des Pairs pour iuger les seditieux, & ceux qui fauorisent les entreprises estrangeres. Et sur ce propos, SIRE, ie vous diray vn petit mot, que vous recognoistrez estre tres-veritable; C'est que si tous vos subiects eussent aimé les Iesuites, ou bien si tous vos subiects vous eussent aimé comme ont fait les Iesuites, ils ne vous adresseroiét pas maintenant tant de belles requestes, vous ne fussiez iamais entré dans le Louure. L'oseront ils bien desnier? quand ils le feront, vostre Majesté ne sera-elle pas neantmoins de mon aduis?

En fin, voici vn merueilleux artifice: c'est que ne sçachans que proposer contre la iustice de cet Arrest, ils en viennent là de dire; Si Chastel nous auoit chargez, si nous estions coupables, pourquoy ne nous faisoit on mourir? A quoy ie leur respons, qu'ils mesurent le cœur des autres par le leur. Car ayans presidé au conseil sanglant de ceux qui ont fait mourir infinies personnes, afin de rendre leur tyrannie espouuentable, ils iugent que quant à eux, ils meritoient bien vne punition plus rigoureuse. On ne les a donc pas fait mourir; d'autant qu'ils n'ont pas esté iugez

par des Castillans, par des Iesuites, qui aux
Terceres firent trancher la teste à vingthuiet
Seigneurs & cinquante deux Gentils-hom-
mes François en vn mesme iour, sur vn mes-
me eschafaut, & pendre cinq cens Cordeliers,
ou autres Religieux qui auoient presché pour
le Roi de Portugal. En France nous sommes
ennemis de ces cruauitez, nous panchons tous-
iours du costé de la clemence, pourueu qu'el-
le ne soit point inhumaine. Si on eust fait
mourir tant de personnes, c'eust esté cruauté :
aussi, si on eust retenu ceux qui auoient causé
tant de barbaries, & qui ne couuent autres
choses, c'eust esté vne autre tres-grande cru-
auté. Que falloit-il donc faire? Les bannir.
Cela est excellemment beau dans Tacite ;
Messieurs, si vous considereZ les meschancetez
estranges de ces gens ici, la corde ne peut suffire
pour leur chastiment : mais ie sçai vn moien, par
lequel vous ne vous repentirez iamais d'auoir esté
trop doux ou trop seueres? bannissez les tous.

Aussi les Iesuites ne sçachans plus que tem-
pester ccontre cet Arrest si vtile & si necessaire
à la France, viennent dire, (& considerons
iusque où les porte leur rage & leur furie) *Le*
Parlement de Paris n'est plus à Paris. Et ie leur
demande, Où est-il donc ce grand Parlement
de Paris? estimé, admiré par tous les François:
par tous les estrangers? Est-il à Madric? Est-ce
donc là où vous voulez appeller du Roy & de
son Parlement? Est-ce là où vous voulez faire
casser triomphaument ce grand Arrest, aussi
bien que vous y fistes casser le Decret de Sor-
bonne de 64? Voyez, SIRE, voyez, ie vous

supplie, leur impudence, leur fierté, leur orgueil: d'oser dire en France, le Parlement des Pairs de France n'est plus en France, *Le Parlement de Paris n'est plus à Paris*. Mais pourquoi voulons nous qu'ils espargnent la Iustice souveraine, puis qu'ils enuoient tuer les Rois avec des cousteaux à deux tranchans?

IL est donc iuste, SIRE, il est tres-iuste de faire executer l'Arrest de vostre Parlement; c'est la iustice mesme. On ne se peut fouruoyer en suiuant ce grand chemin, chemin frayé par tous vos ancestres, qui ont esté plus ialoux de l'execution des Arrests de leur Parlement, que de chose du monde. Et autrement, comment se fussent-ils peu asseurer, que leurs enfans, qu'ils ont quelquesfois laissez au berceau, voire dans le ventre de leurs meres, commanderoient à tant de grands peuples apres eux, sans la force de leur iustice, l'appui de leur Sceptre, les pilliers de leur Couronne, & l'affermissement de leur succession?

SIRE, quiconque vous conseille d'esbranler les Arrests donnez en vostre Parlement sur vne grande matiere d'Estat, n'a iamais bien pesé l'importance, la consequence, la suite d'un tel coup. Vous n'auriez plus rié d'assuré au monde, si vous rauliez, si vousrafoiblissiez, si vous renuersiez vostre grandeur, vostre grande forteresse contre toutes les desobeissances de vos subjects, contre toutes les entreprises des estrangers.

VOILA pour la Iustice, venons à l'Vtilité. Qui ne voit que cest Arrest, SIRE, se doit mettre entre l'un des bon-heurs que Dieu vous a

52
enuoyez ? Si en neuf mois ils auoient trouué vn assassin parmi leur pepiniere, parmi leur seminaire, combien en eussent-ils peu rencontrer en sept ans ? Il y a bien de la difference, de faire cent pas, ou d'en faire huiet cens mille. Quand on a le loisir d'y penser, de dormir dessus, on se rauise souuent : il ne faut qu'un bon moment, & comme on dit, il y a 24. heures au iour. Mais quand en la mesme ardeur, en la mesme rage, en la mesme furie, en sortant de cette chabre infernale des Meditatiōs, on peut tout sur l'heure estre à vos flancs, voila le dāger, Sire, voila le peril tout euident. Il ne faut point loger en des hostelleries, il ne vient point d'aduis de Lion (vous scauez bien ce que ie veux dire) il n'y a diuersité de langues, ni diuersité d'habits : on ne peut receuoir aduertissemens ny pourtraits de nulle part : aussi tost resolu, aussi tost executé. Qui doute que la peste la plus pres de nous ne soit la plus à craindre ? Passons outre : iugeons par leurs deportemens ce que nous pouuons esperer de ces gens ici à l'aduenir. Mais deuant toutes choses, SIRE, il est raisonnable de leur accorder ce qu'ils vous demandent : scauoir, que vous ne vagiez point les quetelles d'un Roy de Nauarre, d'un Duc d'Orleans : Cette requeste est fort iuste. Tout ce que les Iesuites ont fait contre vostre Majesté, par le commandement qu'feu Roy, ne leur doit point nuire : ie diray plus, il leur doit profiter. Ils ont serui leur maistre, vous ne l'estiez pas lors. Aussi n'en a-on iamais ouuert la bouche contr'eux : c'est se feindre des monstres, afin de les debeller, ce qui leur est ordi-

naire: Cela ne leur a iamais esté objecté, & n'eust point eu d'apparence en vostre Parlement. On l'a pris tout autrement, tout au contraire: car entre infinies autres choses on a regardé comme ils s'estoient portez enuers le feu Roy. Que s'ils l'ont bien & fidèlement serui en son besoin, en son affliction, quand scauroit esté contre son propre fils (s'il en auoit eu vn) ils meritent louange. Mais le feu Roy n'estoit point Roy de Nauarre, ny vn simple Duc d'Orleans: il estoit Roy de France. Je n'adiousteray point qu'il estoit leur bien-faicteur, & qui les fauorisoit en toutes choses, ignorant les meschancetez horribles qu'ils couuoient contre luy. Car quand i'ay dit, qu'il estoit Roy de France, i'ay tout dit. C'estoit leur Maistre, ils estoient nez ses subjects, il le falloit seruir, quel qu'il fust, (& en fut-il iamais vn meilleur?). l'ont-ils faict? l'ont-ils fidèlement serui, ou s'ils l'ont meschamment trahi? Voila le fort de ce point: c'est-là où il faut lutter, & non pas voltiger & chercher des campagnes larges, & des lieux communs plausibles, pour faire paroistre son eloquence: il faut venir au nœud de cet article. Escoutez moy bien, Messieurs les Iesuites, ie ne parle point d'un Duc d'Orleans, d'un Roy de Nauarre: ie parle de vostre Roy: Auez-vous serui ce Maistre, ce bon Maistre, ce bon Roy, qui auoit tant faict de cas de vous? qui vous auoit tant cheries, qui vous auoit tant flatez? I'ay beau les interroger, ils n'ont garde de me respondre. Que scauroient-ils dire sur cela, que vostre Majesté ne demente? Je ne veux autre

24
resinoïen qu'elle, de ce que le feu Roy disoit
d'eux. Iamais Prince ne fit tant de plaintes, &
si iustes plaintes de trahisons de siens subiects.
Aussi ce Roy doux, benin, & debonnaire ius-
ques à l'excez, les fit entre tous ses subiects,
chasser de la ville de Bourdeaux: argument in-
fallible qu'ils l'auoient extrêmement & infi-
niment vlcéré & offensé.

Mais qui en peut douter? ne sçauons nous dōc
pas encore, qu'il auoit veu par escrit & tres
bien verifié, qu'ils estoient les vrais auteurs
de la Ligue, qui auoient enforcélé grands &
petits par leur beau langage, noué & conduit
cette conspiration contre l'Estat, & poursuui
à cor & à cri l'excommunication contre sa
Majesté dans Rome, & fait esclater ce tonner-
re en France: aians imbulés subiects de cette
malheureuse croiance; que leur Roy auoit
peu estre excommunié; qu'il n'estoit plus roi,
ains Tyran; & qu'ils estoient deliurez du ser-
ment de fidelité? Et qui est si malin entre nous,
qui ne voie que si Iaques Clement n'eust esté
empoisonné de cette doctrine Iesuite, il n'eust
iamais seulement pensé à entreprendre de mas-
sacrer son Maistre, son Seigneur, & son Roy?
N'est-ce pas cette abominable persuasion, fer-
me & fixe en son esprit, qui luy fit enfoncer le
cousteau dans le ventre de l'Oinct de Dieu?
qui luy roidit le bras, & fit redoubler le coup,
croiant que cet acte heroïque (ainsi que l'ap-
pelle Guignart) le porteroit en Paradis? Et-ce
la pierre, est-ce le traict qui fait le meurtre, ou
celuy qui le lance? Qui est, dis-ie, si malici-
eux, ou si ignorant, qui ne sçache que quand

les Iesuites sont entrez premierement en ce Royaume, tous les esprits des François estoient si esloignez de telles heresies (car autrement ne les peut on appeller; y en a-il de plus dangereuses?) qu'entre vn million de personnes il ne s'en fust pas trouué vn seul qui y eust voulu seulement auoir pensé. Au contraire, nos ancestres ont percé les montagnes, & trauersé l'Italie, pour aller prendre prisonnier celuy qui auoit voulu excommunier le Roy de la Fleur de Lis, & ont fait faire amende honorable à vn audacieux qui auoit commencé de ietter quelque scintille d'un tel feu; Bref auant la venue de ces gens ici, rien ne fut iamais tant esloigné de ces malheureuses maximes, que le cœur des François.

L' A P O L O G I E, de Iaques Clement est, dit-on, aduouee par Boucher: cela est bien aisé à faire, Boucher sçait assez qu'il ne reuiendra iamais à Paris; l'Arrest de Guignart est sa condamnation. Les Iesuites se promettent tous les iours d'y rentrer: c'est vn tour d'ami, que de l'aduouier: ils n'en eurent iamais vn meilleur, ni plus confident; aussi n'a-il point estudié en Theologie que souz eux: toute l'Vniuersité le sçait. Mais ne nous arrestons point à cela, ouurons ce malheureux liure, cette malheureuse Apologie; voyons son fondement, sa base; y en a-il autre sinon que le Roy peut estre excommunié; & les subiects deliurez du serment de fidelité? Que dient, que crient autre chose les Iesuites par tous leurs liures cy-dessus rapportez? Passons outre: à quoy conclut cette Apologie, sinon à ce qu'on cherche,

à ce qu'on trouue vn Aod? De qui l'a-il appris
que de Commolet, & de Guignart, qui escriit;
*Si on ne le peut déposer sans guerre, qu'on guer-
rie: si on ne peut faire la guerre, qu'on le face mou-
rir.* Et plus haut: *L'acte heroïque fait par Iagues
Clement, comme don du S. Esprit, appelé de ce
nom par nos Theologiens, a esté iustement loué.*

Remarquons ces mots (NOS THEOLOGI-
ENS.) Qui sont ces Theologiens? Est-ce S.
Augustin, S. Bernard, & ces autres bons &
sçauans peres? Nullement; j'ai monstté tout le
contraire: ce sont les reuerends peres Iesuites,
qui sont bien autres que ceux-là: ils sont Apo-
stres, ils s'ont de la Compagnie de Iesus: & ceux
que ie viens de nommer, n'estoient que ses
treshumbles seruiteurs, indignes de deslier la
courroie de ses souliers. Et au bout, ce pere
Guignart qui a escriit ces maximes d'une plu-
me d'acier, toute teinte du sang de nos Rois,
est par eux déploré comme vne grand' perte
en la pag. 266. de leur dite defense. Qui a il de
plus enragé, de plus forcené en cette apologie
des assassins?

M A I S ie demâde: Si les Iesuites n'approu-
uoient cette Apologie, permettroiét-ils qu'on
la vendist publiquement dans Douai, comme
on fait? y laisseroient-ils vendre ce discours?
Si ne cōseille-je pas de tuer le Roy d'Espagne;
j'aimerois mieux estre mort: au contraire, ie
dis que quiconque attente à la vie d'un Roi,
est damné indubitablement; c'est attenter à
à Dieu mesmes qui l'a establi.

I L E S T vrai que les Iesuites ne peuuent
pas empescher que cette Apologie ne soit
vendue

A V S S I pour se remettre en credit, ils nous disent deux choses; qu'ils sont vn grand nombre, & qu'ils ont fait de grands seruices à quelques Princes. Quant au premier, ie ne sçai à quoy est bon, de nous alleguer cette multitude, si ce n'est pour nous faire peur. A la verité, ie les crains fort dedans le Royaume; mais dehors ils ne viendront pas assieger Baionne, pourueu qu'il n'y en ait point à Bordeaux qui nous engourdissent. Ils nous veulent parauanture faire croire que leur grande propagation est vn argument de benediction de Dieu; mais voila vne tres-dangereuse & tres-mauuaise conclusion: car ils ne seront de long temps autant qu'estoient les Arfacides ou assassins, leurs semblables; afin de ne parler des Arriens, des Albigeois, des Iuifs, & des Mahumetans. C'est l'argument ordinaire des Lutheriens, que les Iesuites ont refuté, & apres ils s'en veulent seruir pour eux; cela s'accorde mal.

P O V R le regard de leurs seruices faits à quelques Princes; on n'a iamais douté qu'ils n'aient de la capacité: mais qu'y a-il plus dangereux au monde, qu'un grand esprit qui veut mal faire? A quel propos, tant de vanteries de leurs suffisances? on n'a point dit qu'ils fussent des fots. Ils pourront faire seruice, mais ce sera à ceux qui auront ce bon-heur de n'auoir iamais Pape ennemi, & qui n'auront rien à demesler avec la maison d'Autriche: quiconque aura maille à partir avec elle, s'il se fie en eux, sera trompé tost ou tard, & qu'il s'en assure.

S' I L plaist à vostre Majesté de se faire lire les harangues de ces Gentils-hommes de Pologne

en leur Senat; elle y verra vne Iliade de seditions & de guerres ciuiles parmi les Chrestiens de ces grands pais qui s'estendent du Nort au Leuant, esmeues par les seuls Iesuites, qui y ont plus fait donner de batailles, qu'il n'y en auoit eu en cinq cens ans auparauant. Vostre Majesté en sçait bien quelque chose, s'il luy plaist s'en souuenir: il est vray que nous n'auons point de besoin d'aucunes histoires estrange- res, car nous ne fournissons que trop d'exem- ples aux autres. Pleust à Dieu que nos plaintes & nos iustes causes de crainte fussent moins veritables!

M A I S ne les redoublerons nous pas, quand nous considererons que leurs reigles & bulles portent qu'ils iurent d'obeir à leur General, *per omnia & in omnibus*, comme à Christ present? Or ie demande; Si Dieu luy mesme de sa bouche nous commandoit quelque chose, ne le faudroit-il pas faire, fust-il question de tuer son fils Isaac? Qui ne voit donc que quand vn miserable homme, nourry dans ces maximes de l'excommunication des Rois, viendra à estre enfermé en cette chambre des Meditations, & qu'un second Varades apportera vn commandement de son General, lors que le Prince qu'on voudra assassiner fera tout proche; qui ne voit, dis-ie, que croiant autrement se damner & son ame perdue en desobeissant à son General, il l'entreprendra.

M A I S ie veux que dix, vingt, trente le refusent: il n'en faut qu'un pour nous combler de larmes & de miseres. Certainement ie ne peux comprendre, S I R E, comment ceux qui

continueront d'importuner vostre Majesté, ne se représenteront point ce qu'ils ont desia veu: & ne considereront qu'eux & leur posterité seroient à iamais en opprobre à toute la France, si vn second malheur aduenoit. Ie les prie d'y bien penser, & de se souuenir que rien ne se cache si aisément qu'un meschât dessein; & que nul ne peut penetrer dans le cœur de l'homme & dans ses cogitations, sinon Dieu qui se l'est reserué. Pourquoi donc veulent-ils courir ce grand hazard?

M A I S s'ils en trouue d'endurcis (ce que ie n'estime pas) representez-vous, S I R E, s'il vous plaist, qu'ils n'ont point senti le cousteau Iesuite dans la bouche, & que ce n'estoit pas eux que Barriere cherchoit: qu'ils peuuēt estre contregagez en lieu où ils ont affaire des Iesuites pour infinis subiets, & qu'il y en peut auoir encore qui croient que la France demeurera trop temps sans guerres ciuiles, si ces trompettes & ces boute-feux ne reuiennent. Chacun vise à ses desseins: chacun pense à ses affaires: C'est à vostre Majesté, S I R E, à assurer son Estat & celui de sa posterité, contre toutes sortes d'orages, de tempestes, & de tonnerres.

L E P A P E (dit-on) le demande, le desire, le veult: Luy refuserez-vous cela, apres tant d'obligations? Ie respons plusieurs choses. Et premierement, que sa Saincteté, n'aduoüera pas ceux qui voudroient persuader à vostre Majesté de faire vne chose fort dommageable, sous pretexte qu'elle en auroit esté prie par celuy de qui elle a receu de grands plaisirs. Car en ce cas voicy comme en parle vn ancien; *Il n'y a*

rien plus perilleux que les bienfaits, s'ils nous obligent à cette seruitude, de faire ce que nous iugerons nous estre pernicieux. Et vn autre encores plus elegamment? Si à la requeste de mon bienfaicteur i'ai fait chose qui m'ait esté fort dommageable, non seulement la grace est esuanouie, mais aussi il me reste vne grande occasion de plainte. Vn Roy de France est reduit à vne condition bien miserable, s'il ne peut recognoistre vn plaisir par autre moien qu'en mettant le feu à son Estat. En second lieu, ie nie entierement que sa Saincteté le desire. Il aime trop la France, il scait qu'il sortira de ce monde. & que cette societé fera perpetuee par subrogation. Lors qu'elle nous assaillira, il ne nous pourra plus secourir. Vn Philosophe dit, Pour cognoistre si quelqu'un veut vne chose, il faut qu'il puisse ne la point vouloir. Or qui ne voit que le Pape ne peut refuser aux Iesuites, de leur signer toutes les lettres qu'ils desireront? Que diroient mesieurs les Cardinaux qui fauorisent le Roy d'Espagne, à partie desquels il paie pension tous les ans? Ne feroient-ils pas des plaintes ameres & estranges, qu'on abandonne au besoin des gens qui supportent tant de trauaux pour la grandeur du sainct Siege? Sa Saincteté est donc contrainte de signer tout ce qu'ils desireront? & la volonté forcee n'est pas volonté. Passons outre. Ie demande, Si le Pape vouloit qu'on adioustast Valence au Comté d'Auignon, le feroit-on? il est certain que non. Ce qui frappe au general de l'Estat, n'importe-il pas plus que dix Valences? En quatriesme lieu, i'ay bien appris que les Arrests du Parlement

caissent les Bulles qui sont contre les Libertez
& Maximes de l'Eglise Gallicane, ou contre
les Edicts & Ordonnances de nos Rois, ou
contre les Arrests de ses Parlemens : mais ie
n'auois encores iamais sceu, qu'en France la
volonté du Pape puisse renuerfer les Arrests.
Comment se faut-il donc gouuerner en cecy ?
Il est bien-aisé ; c'est qu'il est besoin de tenir
la Saincteté aduertie des principales raisons,
pour lesquelles il est du tout necessaire que les
Arrests du Parlement soient executez. Entre
lesquelles il en faut remarquer vne, qui n'a
point encores esté touchée ; C'est qu'en quel-
ques autres Compagnies & Communautez
il s'est à la verité trouué des hommes qui se sôt
furieusement portez contre le seruice de leur
Roy, & qui n'ont en rien cedé aux Iesuites ; ils
sont allez du pair avec eux. Si l'un crioit haut,
l'autre n'espargnoit pas son poulmō : ce qu'ils
sçauent aujourd'huy fort bien remarquer, &
comme orateurs le font merueilleusemēt son-
ner : Il y en a des discours entiers en leurs liures,
& en leurs requestes, dont la substance est ; Si
nous auons bien fait du mal, les autres Religi-
eux nous ont suivi de pres. Mais ils ne vien-
nent pas au poinct, ils n'ont garde ; cela se passe
sous silence : Le voici ; C'est qu'en toutes les
autres Compagnies, s'il y en a eu de passionnez
pour l'Espagne, il y a eu d'autres qui seruoient
dignement à Tours, à Caen, à Renes, à Angers,
à Châlons, & en si peu d'autres villes notables,
qui resterent en l'obeissance de nostre defunct
Roy. Ces gens de bien, vraiment Chrestiens,
vraiment Catholiques, vraiment Religieux

reiettoïent & renuersoient en leurs chaires de
verité & non de mensonge, de consolation &
non de scandale, la peruerse doctrine de deso-
beïssance que les Iesuites & leurs disciples pres-
choient continuellement dans les villes rebel-
les. Mais entre tous les Iesuites (c'est chose es-
trange, c'est chose esmerueillable!) qu'il ne s'en
est trouué vn seul, c'est bien peu qu'un, ie dis
encore vn coup, qu'il ne s'en est trouué vn
seul, qui depuis 89. iusques à 94. ait proferé
vne seule parole qui peust seruir à son pais, à
son Prince, tousiours extremes pour l'Estran-
ger, & pour adoucir l'apprehension de sa do-
mination. Apres cela que peut-on dire? qui
peut denier que ce ne soit vne conspiration
generale, grande, horrible, furieuse? Et aians
failli leur coup, ils nous estiment bien misera-
bles, bien stupides, s'ils esperent qu'on les
garde encore, afin qu'en vne autre occasion,
aians mieux pris leurs mesures, il nous perdent
tous, avec l'Estat.

IL est vray, SIRE, que pour vous loster
toute apprehension & sentiment, on dit deux
choses: L'une, que ces gens icy sont fort chan-
gez; ce ne sont plus ceux que vous auez vus
autrefois, qui vous ont tant donné de trauer-
ses. En second lieu, on remonstre à vostre Ma-
jesté, que quand ils voudroient luy mal faire,
ils ne sçauroient.

Pour le regard du premier, on vous fait
parade d'une grande resolution prise entr'eux,
qu'ils ne se mesleront plus des affaires d'Estat.
Mais voyons la datte de cette resolution; ils
disent qu'elle est de 93. Comment donc, SIRE,

avez vous desia oublié, que depuis ce temps là
ils ont voulu vous faire tuer par deux fois?
Quelle execution de ce beau resultat? Ne sca-
uons-nous donc pas l'exception generale de
tous leurs statuts (si ce n'est pour le bien de la
Religion) exception qui s'estend si auant qu'on
veut? Mais voulons nous cognoistre commēt
ils sont resolus de ne se plus mesler de l'Estat
& le respect qu'ils luy portent? Il ne faut que
lire leurs dites defences conceuës souz le nom
de la verité defendue, en la page 226. où ils
visent de ces mots; *Mais quelle creature est-ce
cet Estat, voyons-le en face, afin que les Iesuites
ne se meslent de ses affaires, & n'encourent l'indi-
gnation de ses Zelateurs.* Et en la page 231. *Que
ces bons Catholiques donc pensent à ce qu'ils di-
sent, les accusans qu'ils se meslent de trop de cho-
ses, & qu'ils regardent qu'eux-mesmes ne perdent,
l'Estat, faisans si peu de compte de leur foy, &
qu'en cherchant LE REPOS DE LA TERRE, ils ne
le recourent point, & perdent encores celuy du
Ciel.* Est-il possible de faire entendre plus su-
perbement & plus fierement, qu'ils veulent
continuer plus que iamais, de perdre & ren-
uerfer l'Estat, qu'ils disent ne cognoistre
point? & ont raisō. Ils n'ont iamais eu en l'ame
que la subuersion de toutes les polices, le mes-
pris des Magistrats; & l'esleuement des sub-
jects: Aussi se declarent-ils ennemis iurez de
ceux qui CHERCHENT LE REPOS. Et encores
est fort remarquable qu'en cette mesme page
229. pour rendre odieux au peuple tous ceux
SIRE, qui aiment vostre Estat, vostre Cou-
ronne; vostre Sceptre; ils ont fait vn nouveau

mot François, & les appellent ESTATIENS. Pendant leurs tempestes, ils nous appelloient Politiques; ils n'osent plus vser de ce mot, il est trop descrié, ils en forgent vn nouveau, c'est leur ruse ordinaire.

Vous voyez donc, SIRE, comme les Iesuites executent cette belle resolution, de laquelle neantmoins ils font rempart contre tout ce qu'on remonstre à vostre Majesté. Mais qui a iamais ouy parler, de prendre assurance sur semblables promesses, sur semblables resolutions? L'aimerois autant que les corsaires fissent entendre aux marchands, qu'ils ont conclu en vne assemblee generale, de ne plus escumer, de ne plus voler, & que hardiment ils les laissent nauiger avec eux: Cela est bon à dire à des enfans. Aussi qui est si ignorant aux affaires du monde, qui ne sçache que les Iesuites se meslent de tout, autant & plus qu'ils firent iamais? Il ne faut point aller si loing: nos plus proches voisins gemissent souz leur tyrannie, & ne pensent plus qu'aux moyens de s'en deliurer. Mais repournant à nostre propos, je demande; Si les Iesuites estoient reuenus de deça, qui les contrerolle-roit, qui sçauroit tous les portepaquets qui passeroient par leurs maisons, tous les conseils secrets qui s'y tiendroient, tous les aduis qui s'y donneroient? Qui ne voit qu'ils seroient incontinent en pareille liberté qu'en octante huit? Le diray dauantage; Quand bien on apperceuroit leurs menées contre vostre Estat, SIRE, qui estimez-vous qui les aille plus reueler à la Iustice? Qui est-ce qui n'apprehen-dera

dera de reuoir l'annee octante neuf, & se trou-
uer encores sous leur superbe tyrânie; & prin-
cipalement les voyans reuenus après leur ban-
nissement.

A vs si quand on apperçoit, SIRE, qu'il
est trop difficile de vous persuader, que la
mauuaise volonté manque iamais en vn Ie-
suite; on vient au second poinct, que le pou-
voir de vous mal faire leur defaudra. Et afin de
disposer vostre Majesté à cette creance, les Ie-
suites ne manquent par leurs requestes d'exal-
ter vos victoires, & de tourner en nostre lan-
gue tous les anciens Panegyrics. SIRE, natu-
rellement les hommes aiment à ouyr racon-
ter leur felicité, leur grandeur, l'assurance de
leur Estat, & de leurs enfans, & encore, leurs
louanges. Et à la verité, ie suis tres-aïse quand
ie voy des gens qui vous aiment comme leur
vie, & qui vous affectionnent de tout leur
cœur, pousser vos faits-d'armes & vos triom-
phes iusques dans les cieux. Cela est deu à la
vertu: c'est sa nourriture, c'est son element,
c'est sa plus belle recompense. Mais gardons
nous, SIRE, ie vous supplie, gardons nous
des louanges de nos ennemis. Les anciens ont
remarqué que les plus subtils magiciés enchaî-
toient en louant: Gardons nous, SIRE, de ces
Sirenes, qui flattent les oreilles si doucement
pour endormir les mariniers, & leur faire rom-
pre. Quand vous oiez, SIRE, tant de belles
paroles en leur bouche, ne vous souuenez
vous point de la vostre blessée par vn de leur
seminaire? Quand vous oyez tant de fleurs
d'eloquēce; ne vo^s souuenez vous point qu'a-

uec cette meſme force d'eloquence leur Princi-
pal encouragea Barriere : SIRE, ils vous ſcauēt
bien remarquer par leur requeſte, que ce grand
Orateur Romain extolloit ie ne dy pas la cle-
mence (qui eſt touſiours loüable eſtant accō-
pagnée de iugement, autrement elle ne ſeroit
plus vertu) ains la ſotte bonté de Iules; l'extol-
loit (dis-je) par deſſus ſes cinquante deux ba-
tailles : Mais ils n'acheuent pas l'hiſtoire, c'eſt
qu'il l'endormit ſi bien par ſon beau langage,
qu'il rappella à l'entour de luy ſes plus mortels
ennemis, qui bien toſt apres tuerent à coups
de ſilet celui que ny Mars, ni Bellone, ni des
millions d'hommes armez n'auoient peu of-
fenſer. Laiſſez-vous enjoler de meſmes, ils ne
vous eſpargneront non plus : & ſi ils ſçauront
auſſi bien chanter triōphe, que le meſme Ora-
teur qui cria depuis : *Peu ont frappé Caſar de la*
main, mais tous l'ont tué de volenté. Ie ſçay bien
que vous repliquerez, que ce grand Empereur
eſtoit vn uſurpateur : & ie vous reſpondray,
qu'une peau de parchemin Romain vo' peut,
ſelon la doctrine Ieſuite, rendre tyran. Doctri-
ne qu'ils confeſſent, & s'en glorifient encores
à preſent, & ne la nieront point à l'aduenir, ſi
premierement leur General, ſubiect d'Eſpā-
gne, comme ont eſté tous les autres quatre, ne
leur baille vne diſpenſe *ad cautelam* de deſgui-
ſer leur doctrine, à l'effect de rentrer en Fran-
ce. Mais difficilement trancheront-ils le mot,
de dire, que le Pape ne puiſſe excommunier &
fulminer les Rois, & deſlier leurs ſubiects du
ferment de fidelité. Comment accorderoient-

67
ils toutes leurs escritures : Ces variations seroient nouvelles charges & nouvelles preuves contr'eux.

Retournons à nostre propos : On vous dit donc, SIRE, vous estes trop bien establi, trop crainct, trop redouté ; tout tremble sous vous ; que vous scauroient faire les Iesuites ? Voilà qui est fort beau ; & d'autant plus beau, qu'il est pour la pluspart veritable ; donc bien nous prend, & dont ils sont tres-marris. Mais deuant toutes choses ; considerez, s'il vous plaist, SIRE, que ceux qui vous font tant magnifier vostre pouuoir, se sont maintenus en deux prouinces de vostre Royaume, contre vostre Edict, contre vos Arrests. Je scai bien que depuis quelques annees ils ont vne espece de surseance ; mais ils n'en ont pas tousiours eu. Apres cela, SIRE, vous vous souuiendrez, s'il vous plaist, qu'en Mai 84. le feu Roy estoit tresbien establi dans l'heritage de ses freres, de son pere, & de son aieul : il estoit appuié d'un frere qui tenoit beaucoup de gens en eschec ; & neantmoins dans quatre ans apres les Iesuites l'ont chassé du Louure. Je di eux ; les autres n'ont esté que les bras & les iambes ; ceux-ci estoient la teste, qui conduisoit la barque. Qui le scait mieux que vostre Majesté ?

Et neantmoins, SIRE, pour vous dire franchement ce que ie pense, sans vous croistre les iustes crainctes, sans les diminuer aussi (ce dernier seroit encores le plus dangereux, la deffiance est vne bonne drogue en matiere d'Estat, vous en auez souuent vsé, & bien vous en a pris.) Pour vous dire donc ce que ie pen-

se, ie ne croy pas que tant que vous viurez (& Dieu vueille que ce soit encores cinquante ans & plus) les Iesuites puissent iouer leurs ieux à huis ouuert: Mais ie m'assure que vostre Majesté demeurera d'accord avec moy, qu'il n'est pas en vostre puissance, ny de tous vos Parlemens, d'empescher que doucement, sans y toucher, ils ne respandent leur opinion sur le faict de l'excommunication & de sa force, dans les esprits de vos subiects en tous les lieux où ils se trouueront.

VOILA donc vn mal, non point petit, non point mediocre; mais grand, tres-grand. Et quel plus grand se peut-il trouuer, que de vous faire perdre parauanture en moins de quatre ans vn million de subiects? O la dangereuse peste! Voila, dis-je, vn mal qui aduiendra de vostre viuant, de vostre regne: quelque diligence, quelque precaution que vous y puissiez apporter vous ne le scauriez empescher, & vous en souuenez.

ON vous propose des reiglemens, des restrictions, des modifications: on vous trompe. Quels peuent estre ces beaux reiglemens? Voyons-les, mettrons-les sur le tapis. Quoy? Les Iesuites ne parleront-ils plus à personne? Ne verront-ils plus personne? De quoy seruiront-ils donc? N'instruiront-ils point la jeunesse? C'est neantmoins le seul pretexte de ceux qui parlent tant pour eux; encores que la verité soit, qu'ils ont à demy estouffé les lettres, que le grand Roy François, pere des Muses, auoit ramenees en France (& la cause du mal cessant par tout le Royaume, le mal cessera.)

Ils auront donc la ieunesse sous leur verge : & en ce cas comment pensons nous empescher qu'ils ne l'imbuent de toutes ces dangereuses doctrines, dont nous auons parlé?

Mais, feignons qu'ils n'aient point de Colleges : vous n'empescherez pas tous leurs anciens confreres, la sentine des villes, de les aller voir. Et Dieu sçait si la nouueauté en France a des effects esmerueillables ! Dieu sçait les trompettes & les auant-coureurs, qui seront desia arriuez ! Dieu sçait s'ils sçauront chanter triomphe, & releuer banniere ! Vous ne ferez pas fermer leurs portes, pour empescher qu'on ne les aille visiter. Le pretexte de pieté peut-il manquer à quelque heure que ce soit ? D'auantage, quelles importunitez pense vostre Majesté auoir chacun iour, & du dedans, & du dehors de vostre Roiaume, pour oster tous ces reglemens, toutes ces restrictions qu'on vous propose maintenant, afin seulement de leur ouuir la porte ? Ceux qui vous le mettent en auant, seront les premiers qui parleront pour les faire leuer, & pour remettre les Iesuites partout. C'est ce qu'ils leur disent à l'aureille ; Prenez cela seulement, remettez-vous là seulement, esbrechons cet Arrest, & ne vous souciez d'autre chose. Combien de solliciteurs auront en leur presence ceux qui en ont tant en leur absence ? Vostre Majesté n'aura plus lors le grand bouclier d'un Arrest de son Parlemēt, qui doit estre inuiolable. Quelle plus belle excuse au monde pouuez vous auoir contre toutes importunitez ? Ce bouclier sera brisé. Que pourrez vous dōc dire, pour empescher qu'ils

ne soient par tout, comme en 88. sinon que ce
sont de dangereuses gens? Hé bon Dieu! que
ne le dites vous dès maintenant? Vous avez
encores la mémoire toute fraîche de ce qu'ils
sçauent faire: si vous l'avez perduë, mettez la
teste à la fenestre, il est difficile que vous soyez
en lieu de vostre Royaume, dõt vous ne voyez
infinies mesures de maisons où ils ont mis le
feu: infinis orphelins qu'ils ont reduits à la be-
sace. Cela ne vous touche il point le cœur? Si
fait, ie m'en assure: vous l'avez trop bon.
Mais leurs sollicitateurs vous tiennent à la gor-
ge: n'avez vous point de bras?

VOILA, SIRE, la centiesme partie du
mal qu'ils feront de vostre viuant mesmes. Si
vous iettez cette feuille de papier en vn coin
de quelque cabinet, & que vous la retrouuiiez
vn iour par hazard, vous iugerez si j'auray dit
vray.

M A I S, ie veux qu'ils n'osent seulement
souffler, tant qu'ils verront vostre visage. La
prudence des grands Princes ne doit elle point
penetrer au dela de leur vie, & sur tout, aians
lignee? S I R E, quand nos corps sont en bon-
ne disposition, nous ne sentons point infinies
incommoditez qui s'agrippent durant vne ma-
ladie. De mesme, quand la santé des grands
Roiaumes vient à estre troublee par les acci-
dens qu'il plaist à Dieu de leur enuoyer; beau-
coup de mauuaises humeurs se remuent, qui
ne se sentoient point durant la felicité. Ce sôt
ces saisons, ces occasions, que les Iesuites at-
tendent de pied-coy; & ne les perdent iamais.
S'ils ne peuuent emporter la place du premier

assaut, ils redoublent leurs forces au second, & puis encores au troisieme. En toutes choses les opiniastres le gagnent. On n'a pas tousiours la mesme vigueur, le mesme courage pour resister. Quelles plus dangereuses maladies, que les recheutes, & dont nous soions moins plains quand elles viennent par nostre faute, & sur tout, quand la cause du mal a bien esté recogneuë, & que nous n'auons tenu cōpte de nous en garder? Dieu vueille que i'aye mal prognostiqué, mais ie preuoy qu'en fin le Iesuïte reduira en cendre cet Estat. Nous l'auons veu par luy vne fois embrasé d'un feu si espouuëtable, qu'on le voioit de l'Asie. Il s'est trouué vn grand Roy, plein de valeur, plein d'experience, qui ne dormoit que quand il vouloit, de fer au trauail, & d'acier aux combats, qui a estouffé le mal pour cette fois. Mais Dieu ne dōne pas tousiours de ces grāds Princes, & en la fleur de leur aage. Qui ne voit qu'à la premiere nuict de cet Estat, ce feu mal esteind se rallumera plus grand qu'il ne fut iamais, & perdra nos enfans. C'est vous que ie plains, mes pauures enfans; car quant à moy, mon aage caduc m'oste cette apprehension.

I'ENTENS bien, SIRE, quelqu'un qui vous dit à l'oreille: A la verité on vous parle par escrit, & y a grande apparence en ce qu'on vous propose; mais ie ne puis pas comprendre comment les Iesuïtes vous pourroient offrir tant de seruices, si leur doctrine estoit telle que nous la venons d'entendre. Et par auanture, SIRE, que celuy qui vous le dit le croit ainsi, & le fait à bonne intention, comme, la pluspart

de ceux qui vous parlent pour eux, ignorent la verité que ie vous viens de représenter. Et s'ils la sçauoient, ils vous prieroient avec autāt d'affection de commander l'execution entiere de vos Arrests, qu'ils vous importunent aujourdhuy de les rompre. Voici donc l'esclaircissement de la pure verité.

SIRE, lors que les Iesuites vous ont présentée ces grandes requestes si fallerees, si pimpan-tes, tant pleines d'attraiets, tant pleines de miel, vous estiez du tout bien avec la Saincteté. Quelle consideratiō donc les pouuoit lors empêcher de vous promettre seruice? que pouuoient-ils dire autre chose? falloir-il encores se vanter d'estre vos ennemis iurez, vos ennemis capitaux? estoit-ce le chemin de Paris?

M A I S avec vous, SIRE, remarqué qu'encores que ces Requestes soient infiniment longues, que neantmoins ils n'ont enfoncé, n'ont pas seulement touché ce point de la question, ce nœud de la controuerse, cette doctrine tant perilleuse: sçauoir, S'ils ne croient pas, s'ils n'enseignent pas, que le Pape peut excommunier les Rois, & mettre la main sur leurs Couronnes, qui est la base & le fondement de tous les assassinats perpetrez ou attentez en l'Europe, & la source de toutes les miseres que nous auons endurees depuis que cette malheureuse doctrine s'y est semee hardiment. C'est là, Messieurs les harangueurs, où vous deniez donner, & non pas faire des discours sur l'obeissance que les subiects doiuent naturellement à leur Roy. Voilà de grandes nouuelles, n'avez

vous pas tousiours vostre exception? Et quelle est cette exception? La voici? Pourueu que les Rois ne soient point excommuniez par le Pape, lequel peut deslier tous les subiects du serment de fidelité. Voila le point de la matiere. Respondez nous précisément, & sans tournoyer? Est-il vray que vous apportez cette exception, ou si c'est vne calomnie? Mais à quoy est-ce que ie perds temps, de leur demander leur opinion sur ce subiect? voila leurs liures qui en sont tous pleins, ils ne crient, ils ne tempestent autre chose. De quelle autre source est venu le mal que nous auons endure? sommes nous insensibles? Qui a faict donc receuoir en France l'excommunication contre le feu Roy en 1589. laquelle sans les Iesuites, n'eust eu non plus de force que celle de 1591. dans Tours, où il n'y auoit point d'ames Iesuites, & engagees avec les estrangers? Ne voyons nous pas que tant s'en faut qu'ils ayent denié ceste doctrine, qu'au contraire ils s'en sont glorifiez, voire depuis leur exil, ainsi que ie l'ay monstre au commencement? Mais les estimons nous si simples que de venir par leurs Requestes donner dans ce filet? Il faudroit auoir bien mal leu la Rhetorique, qui enseigne de passer sous silence les objections qui n'ont point de response: Le lecteur n'y prend pas tousiours garde de si pres, cela s'oublie: Pourueu qu'on responde à chose qui en approche vn peu, c'est assez. Iamais artifice reüssit-il mieux à Orateur, que celui-cy aux Iesuites? S I R E, qui a aduertí vostre Majesté qu'ils passoient sous silence ce grand poinct de la cause? Quelqu'un vous a-il re-

monstre; Les Iesuites retiennent à dire, ils ne parlent point François, ils vous flattent maintenant que vous estes bien au Pape; mais ils se gardent bien de dire ce qu'ils feroient, si Dieu nous auoit tant affligez que de retirer le Sainct Pere à luy, & de nous donner vn Boniface huictiesme, vn Benoist treisiesme, vn Iules second, qui nous enuoiaist vne excommunication semblable aux autres fulminees contre nos Rois Tres-Chrestiens, Tres-Catholiques & les premiers Rois de la Chrestienté. Nous auons recogneu, SIRE, par leurs liures par toutes leurs actiōs, & par tant de predications qu'en vn tel coup, si on les vouloit croire, ils feroient de vous ou de vostre successeur vn Roy sans subiects, vn Seigneur sans heritage, vn homme priué, particulier, maudit, execré, miserable vagabond: Bref, tel qu'ils ont esperé rendre vous & le feu Roy, & qu'ils vous eussent rendu de faict, si tous les Catholiques de France eussent esté bons Iesuites, comme on vous conseille de les faire, en rappelant ces gens ici, pour les endoctriner & fischer auant dans l'esprit de leur ieunesse ceste ferme croiance, que vous & toute vostre posterité à iamais pouuez, avec vne Bulle, estre chassez du thronne de Sainct Loïs.

MAIS qu'est-il besoin de raisons, puis que i'ay des exemples qui vous touchent de si pres? SIRE, vous auez cognoissance de beaucoup d'histoires (Ie vous en ay ouy r'apporter, que des gens qui faisoient bien les entendus, ne scauoient pas;) mais quand vous n'en auriez jamais appris qu'vne ce seroit celle-ci; laquelle

neantmoins ie reciteray en peu de mots, car il faut necessairement que vous l'ayez oubliee. L'an 1512. il y auoit vingt-neuf ans que la Royna Catherine iouissoit de son Royaume de Nauarre, à elle aduenue par le decez de François Phœbus son frere; & la succession d'infinis ses predecesseurs Rois. Il y auoit dixhuiet ans qu'elle auoit esté couronnée avec le Roy Iean d'Albret, son mari, dans Pampelune: Dieu leur auoit donné vn fils & trois filles: Leur Royaume estoit si florissant & si puissant, qu'il auoit tousiours battu & Castillans & Arragonnois. Ils estoient en pleine paix avec eux, & en estroitte & ancienne alliance avec la Couronne de France, infiniment aimez de nostre Loys douziesme, grand Roy, grand Capitaine; bref, il ne sembloit pas que toute l'Europe eust seulement osé penser de les assaillir; Et neantmoins le Pape en haine des François, lança son excommunication sur ces Rois: deslia leurs subiects du serment de fidelité, & donna leur estat en proye au premier qui le pourroit conquerir (qui est le stil ordinaire.) Par la mesme Bulle nostre Roy est aussi fulminé, comme il auoit desia esté. Qu'aduint-il? Pour le regard des François, il n'y en eut vn seul qui branslast iamais: tout au contraire (& admirez ici nostre bon naturel, SIRE, auant que nous eussions gousté la doctrine Iesuïte, cela vous fera encores mieux cōgnoistre la playe qu'ils ont faite en vostre Royaume) tout au contraire, dis-ie, tous nos ayeuls, sans vn seul excepter, redoublerent leur courage pour seruir leur Roy, malgré la haine que Iules luy portoit, & augmen-

terent tellement leur amitié enuers leur Prince qu'ils ne le croyét pas où ils le voyoient, & l'appeloient leur pere, leur conseruateur, leur bon Roy: bref le nom de Pere du peuple lui est demeuré & demeurera à iamais.

Av contraire, qu'aduint-il en Nauarre? Le Roy & la Royne firent assembler leurs Estats à Tudelle: il y est arresté de les seruir iusques à la mort, nonobstant la fulmination du Pape. Mais il se trouua incontinent des seditieux, des mutins, des banqueroutiers, des desireux de choses nouuelles, qui ne manquent point de prendre le pretexte de Religion: il n'y a iamais qu'eux de Catholiques, à les ouyr parler: ces gens-là commencerent à semer parmi le peuple, toute la mesme doctrine que ie vous ay ci-dessus rapportee, laquelle nous auons veu depuis respandre en France par les Iesuites. Qu'aduint-il donc en Nauarre? il aduint que ces seditieux rendirent tous les autres subjects engourdis, sans bras, sans iambes, les vns par Religion, les autres par crainte de ces mutins qui les menaçoient: De sorte que vostre bifaieul & vostre bifaieule, SIRE, se trouuerent au milieu de tous leurs subiects, sans subiects; au milieu de tous leurs seruiteurs, sans seruiteurs: au milieu de leurs armées sans gendarmes: En fin, il ne fut iamais vne defection, vne prodicion si lasche, si honteuse, si miserable: & furent contrains, tcnans quatre petis enfans, del'vn desquels vous estes descendu, SIRE, de se sauuer en France: faisant vne peau de parchemin en vne heure, ce que tout l'Arragon, toute la Castille n'eussent sceu faire en mil ans. Quand on

perd vn Royaume apres auoir esté rompu en
en trois ou quatre grandes batailles, c'est cho-
se qui est aduenüe a infinis autres, cela sert de
consolation: mais de se voir chasser de son Es-
tat, sans qu'un seul de ses subiects tire l'espee,
sous pretexte de Religion, c'est ce qui surpasse
tous les regrets, toutes les desolations, toutes
les miseres qui se peuuent excogiter au
monde.

L'ANNEE suivante 1513. nostre Roy esmeu
d'une iuste douleur de voir vn Roi & vne Roi-
ne despouillez de leur Estat à son occasion,
dresse vne armee qui passe les Pyrenées, & s'en
va droit à Pampelune: laquelle fut attaquée de
si pres, que de L'isle de Villiers, & de Cannay
planterent leurs drapeaux sur les murs: mais s'y
trouua de si opiniastrés defenseurs, qu'il fallut
reuenir sans rien faire. Huiet ans apres, à la prie-
re de Henri d'Albret, Roy de Nauarre le Roy
François enuoya vne seconde armee, laquelle
prit Pampelune, mais elle fut incōtinent apres
reperdue, En ceste guerre Ignace Laiola parut
infiniment, & estoit l'un des Capitaines des
bandes Espagnoles: il est vray que sa valeur
luy cousta vne iambe, & si l'autre luy de-
meura fort blessée. Ce Capitaine est le fon-
dateur & le patron des Iesuites. Voyez, SIRE,
si les disciples ont sceu suiure les traces de leur
maistre? s'ils ont sceu continuer l'affection ar-
dente enuers l'Empire de Castille, & la haine
extreme en vers la France? Le fondateur a gran-
dement aidé a faire demeurer les Nauarrois
sous le ioug Castillan? & les disciples ont mis
la liberté des Gaules au hasard d'une bataille

Ie dis d'une, car nous ne pouuions perdre vne
iournee sans vous perdre, SIRE, puis que vous
n'avez iamais voulu auoir d'autre retraite que
la banniere des fleurs de Lis : & en vous perdant
qui ne voit que la France demeueroit comme
la Nauarre, serue & captiue sous le ioug, la ra-
me & la chaisne de Castille? Passons outre : Le
patron fut l'un des chefs de la garnison Espa-
gnole dans Pampelune? & les disciples ont mis
& maintenu durant trois ans la garnison Ca-
stillane dans Paris. Mais tout cela n'est rien à
comparaison de ce que ie m'en vai dire. Les di-
sciples de Laiola preuoians avec vn vif iuge-
ment : que le petit fils de ce Roy & de cette
Roine, ainsi miserablement desheritez, seroit
vn iour la terreur de Castille, ont fait tout ce
qui peut tomber en l'esprit des plus iurez &
mortels ennemis du monde, pour exterminer
ce rejetton : & le voyant : malgré leur rage, mō-
té au throsne de saint Loys ; ils ont redoublé
& leur crainte & leurs efforts contre sa person-
ne & son Estat, versant en abondance sur son
peuple le mesme poisō qui auoit autrefois fait
perdre le Royaume de Nauarre, & qui n'auoit
iamais peu estre apporté en France, que par ces
subtils & hardis drogueurs. Rien de tout cela
n'a esté ignoré par cet heritier de la Roine Ca-
therine : & neantmoins vne certaine influen-
ce, vn certain defastre, aussi fatal, aussi inéuita-
ble aux François qu'aux Nauarrois, luy à tan-
tost persuadé de retenir ces mesmes disciples
de Laiola en son Royaume dont ils ont esté
solemnellement bannis par ses Parlemēs. Qui
est ce qui pourra iamais croire choses si estran-

ges, & qu'apres auoir esté si long temps combatu avec la peau de Lion, on se laisse piper avec celle de Renard.

MAIS il ne se trouue pas tousiours des Iules second. Il est vray: aussi ne se trouue il pas tousiours des Couronnes à perdre. Il ne faut point tant de Iules: il n'en faut plus qu'un, pourueu qu'il trouue les François DISPOSEZ aussi bien que les Nauarrois. Considérez, SIRE, considérez deux & trois fois ce que ie m'en vai vous dire. L'excommunication de Iules ne fit tourner vne seule ville en France: L'excommunication de Sixte a fait reuolter Paris, Lion, Rouen, Tholose, Marseille, Amiens, Narbonne, Orleans, Bourges, Nantes, Troyes, Dijon, & infinies autres. Que dites vous des Iesuites? Ne voila pas de braues champions & d'habiles hommes? Si en trente ans ils ont fait un tel progrez, qu'eussent-ils fait à l'aduenir ayans desia tant de consciences esbranlees, tant de ieunesse endoctrinee, qui montoit chacun iour aux charges? Pourquoi les vieux aux compagnies se sont ils trouuez quasi tous bons François, & les ieunes quasi tous ennemis? Pourquoi auons nous veu tant de fois le fils directement opposé à l'aduis du pere? Sinon parce que les anciens n'auoient point succé le laict Iesuite? Mais voulez vous cognoistre, SIRE, qu'ils sont encores si hardis, de se glorifier d'auoir fait cette grande & horrible plaie dans les esprits de vos subiects, laquelle ils croissent, esgratignent, & augmentent chacun iour? Il ne faut que vous rappotter les paroles que ie vous ai ci deuant transcriptes de

leurs defences. Et partant voyons nous auoir esté
pratiqué l'usage de ce glaive en la personne de plu-
sieurs Rois, en plusieurs Royaumes. Et si la prati-
que n'a tousiours esté profitable elle la peut tousiours
estre, SI LES SVBIECTS EVSSSENT ESTE BIEN DI-
SPOSEZ. Voila pas parler bien clairement, &
dire, Les François n'estoient point anciennement
BIEN DISPOSEZ à abandonner leurs Rois au pre-
mier coup de Tonnerre d'excommunication, au
contraire ils redoubloient leur affection enuers eux
mais en trente ans nous en auons DISPOSE une si
bonne & si grande partie, que peu s'en a fallu que
nous n'ayons obtenu victoire. Si par nos artifices,
& recommandations de tant de diuers lieux, nous
nous y pouuons encor maintenir, nous DISPOSE-
RONS SI BIEN LES ESPRITS DES FRANÇOIS
qu'une autre fois nous chäterons le triomphe entier.
Certainement; SIRE, vostre posterité vous
aura vne grande obligation, si vous l'asservis-
sez miserablement à la fantasie du premier par-
tisant d'Espagne, qui sera esleué au S. Siege;
en retablissant ceux qui sont si hardis & si ou-
tre-cuidez, de semer cette doctrine schismati-
que, & de s'en glorifier encores; la crier tout
haut, la publier par tout, qui est tousiours ad-
uancer l'ouurage. A quoy sont bonnes, SIRE,
tât de caresses que vous faites à vn Enfant qui
est au berceau, si au meisme temps vous intro-
duisez les maçons qui viennent bastir de grā-
des fortresses en France, afin qu'au premier
son de trompette on lui rēde tous ses subiects
aussi estōnez, aussi percluds, aussi DISPOSEZ,
que furent les Nauarois l'an 1512? N'est-ce
point assez qu'une telle doctrine luy ait fait
perdre

perdre Pampelune, sans qu'elle luy oste encores Paris?

IL est vray, que les Iesuites par leurs Requestes vous offrent des cautions, qui vous garantiront vous & les vostres de tout dommage. Je n'auois encores iamais entendu, SIRE, qu'on prist des cautions en matiere de Couronnes: & à la verité, pardeuant quels Iuges les pourroit on faire appeller, lors qu'on seroit chassé, errant, vagabond par le monde? Si se faut il accommoder. Prenōs donc des cautions, pourueu qu'elles soient soluables; autrement ce n'est rien. Voions quelles elles seront. Entre vos subiects, SIRE, il est impossible qu'il y en ait d'assez richez: car leurs biens ne peuuent estre la milliesme partie de ce tout, dōt il faut auoir asseurāce. Entre les Estrangers, qui pourroient ils presenter suffisant pour respondre du Royaume de France? Le voy bien que n'est, SIRE, la caution qu'ils vous donneront de leur fidelité, de leur affectiō à vostre seruice; est le Roy d'Espagne, qui s'obligera pour eux corps pour corps: Il est si riche, il est si grand terrien, IL AIME TANT LA FRANCE, pourquoy le refusez vous?

VOILA donc qui est bien resolu pour les cautions: pensons au reste. Que deuiendra cette Colonne, SIRE, qui deuant vostre grād Palais, marque dans son marbre à nostre posterité, l'affection de tout ce grand peuple enuers son bon Roy, enuers son grand Roy, son liberateur, qui la mesme année luy auroit osté de dessus le col, le ioug Espagnol? Colonne plus honorable, plus glorieuse, que celles de

Trajan & d'Antonin, desiantes les ans, & consacrees à l'immortalité.

LA LAISSERÉZ vous debout, en faisant néanmoins tout le contraire de ce que vous mesmes auez ordonné par l'Arrest qui y est graué? Que diront tous ceux qui liront l'opposite de ce qu'ils verront? Est-ce là donc ce grand Senat de France? ses Arrests sont escrits en marbre, mais par effect ils sont mesprisez, ils sont foulez aux pieds.

ALA verité cela seroit trop honteux. Que faut il donc faire? il faut tout presentement aller abbatre cette Colonne, Comment l'abatre? Y auroit il bien homme si malheureux au mode qui vous voulust donner cet abominable conseil, de réuerfer vous mesmes; SIRE, les trophées de vos plus grandes & plus signalées victoires? noircir vostre memoire de crainte & de pusillanimité, afin que comme nous marquons vn de nos braues Rois pour le premier, qui rompit du tout le ioug de l'Empire Romain, sous lequel les Gaules miserables auoient languit tant d'annees. Aussi que tout à l'opposite l'histoire vous notte à iamais pour le premier qui flechissant souz les mandemens de Rome, auez vous mesmes arraché vos lauriers, flestri vos palmes, & miserablement demoli les monumens de vos prouesses & de vos bien-faicts enuers vostre ville de Paris, le domicile de ce grand Empire, la gloire de l'Europe, & la merueille du monde.

HE! que pourroit souhaiter d'auantage le General des Iesuites, si toute vne grande ar-

mee Espagnole conduite par les siens, & le reste de leurs Seize, estoient entrez dans Paris par la breche; ne commenceroient-ils pas par le bris de cette colonne? Faut-il donc, SIRE, que la France endure sous vostre regne, & par vostre commandement, la plus grande vergogne, la plus grande brauade qu'elle pourroit souffrir de l'insolence de Castille?

SIRE, si le lendemain de vostre heureuse conuersion, à Sainct Denis, il fust venu vn Ange du ciel, qui vous eust monstre Paris, & dit: Les Iesuites & la garnison Espagnole qu'ils ont mise dans cette grande ville, & qu'ils y maintiennent à force de prescher le peuple en sa faueur l'empeschent seuls d'y entrer, tous les gens de bien n'y desireroient: tu y entreras neantmoins, malgré ces meschans, & bien tost: neuf mois apres ils te voudrôt faire massacrer, mais ils ne pourront: ce grand Dieu de là haut destournera le coup, & fera confesser à l'Assassin, que la doctrine malheureuse des Iesuites, & leurs propos ordinaires contre toi, l'ont porté & poussé à te frapper, & Dieu fera que cette declaration sera encores verifiee par escrits de leur propre main. Ils en seront tous bannis: mais sept ans apres tu les restabliras, à la ruine de ton Estat, & desolation de ta maison. Si vn Ange du ciel (dis-je) vous eust fait cette prediction, SIRE, l'eussiez vous estimee veritable? Il est certain que non; tant le dernier point dependant de vostre volonté, vous eust semblé sans apparence. Et neantmoins confiderez, s'il vous plaist, combien peu s'en a fallu

444
que vous n'ayez acheué de l'accomplir, ayant si tost oublié le mal que vous ont fait, & peuvent faire tous les iours ceux qui appellét *Rebelles* nos anciens Rois, d'autant qu'ils n'ont pas ietté par terre leurs Diadêmes & leurs Couronnes au premier bruit des excommunications enuoiées contr'eux: & qui en consequence de cette mesme doctrine furieuse, ont fait croire a infini peuple, que nostre defunct Roy estoit *vn Tyran, & vn rebelle*; Ce qui a vrayement causé sa mort.

NE vous representez-vous point, SIRE, l'image haute, passe, morne, triste, de ce grand Prince, vostre bon frere; tel qu'il estoit lors que tout blessé, tout ensanglanté, il vous témoigna vne affection de pere iusques au dernier soupir de sa vie, vous tenant embrassé au milieu de son armée, toute baignée en larmes, toute grosse de vengeance?

IL est là haut, il est bien-heureux, il est mort pour la liberté de son pays, pour deliurer de captiuité ses enfans; il contemple vos actions. Quoy? que vous cassiez les arrests de son Parlement donnez contre ces parricides qui l'ont fait d'aguer de son viuant, qui l'ont poignardé apres sa mort, s'escrians en toute l'Europe; *Le mesme iour qu'il nous faisoit chasser de Bordeaux, il fut chassé de la vie. On dit qu'il nous auoit fait mener à S. Macaire pour nous esgorger là tous, s'il n'eust esté le premier esgorgé.* Ce n'est point, SIRE, vn Iesuite, ce sont tous les Iesuites en corps, qui par leurs lettres annales & solennelles chantent ce triomphe en toute l'Euro-

pe? mais bien par toute la terre en leurs colonies, où ils monstrent maintenant les cruels effects de leurs dangereuses maximes; où, dy-ie, ils monstrent en trophée la chemise sanglante de nostre feu Roy, les despoüilles superbes du premier Roy du monde, foudroyé par les tonnerres qu'ils ont fait esclatter en France, où auparavant leur arriuee ils n'auoient jamais eu aucune force. Nous voudriez-vous bien, SIRE, ôster la consolation qui nous reste, & la seule marque, la seule souuenance que nos neveux auront de l'assassinat de nostre defunct Roy, de nostre defunct maistre.

HELAS, mon pauvre Maistre! hélas mon pauvre Prince! si ie n'ay peu autre chose, au moins auras-tu ces derniers pleurs, ces dernières larmes de ton tres-humble seruiteur, de ton tres-fidelle subiect. Et parauanture seront elles accompagnées des soursours d'un million de François qui meliront, si ce n'est en ce siècle, ce sera aux autres. Car pourquoy mes sanglots, pourquoy mes gemissemens ne dureront-ils autant que les bons François au monde?

Si nos ayeux, SIRE, eussent auallé cette doctrine empoisonnée de l'excommunication, & de la puissance de transferer les Royaumes: cette grande succession ne fust pas venue iusques à vous: il y a long temps qu'on l'eust arrachée à vos ancestres. Le bannissement des Iesuites est la mort de cette malheureuse doctrine, est la vie, la gloire, & la splendeur de vostre maison Royale. Ceux qui vous diront le contraire, la voudroient voir renuersée par terre:

Vous le sçauiez, & le sçachant, si vous n'y remediez, vous sappez vous mesmes les fondemens de vostre Estat, au lieu de les affermir.

La magnanimité, la generosité d'un grand Roy ne se monstre pas seulement à la guerre, au front d'une fiere bataille, animant sa Noblesse, tout couuert de panaches pour se faire marquer à ses ennemis, defiant leur audace & leur forest de lances, qu'il s'en va foudroyer: Mais elle paroist encores d'auantage, SIRE, aux deliberations des grands & importans affaires de son Estat. La prudence y doit reluire: mais il faut chasser arriere toute peur de desplaire, toute crainte de fascher: Elle est indigne de vous, elle est indignée d'un Roy de France, quand il ne seroit point ce que vous estes. Un Roy de France ne reçoit la loy que de Dieu. Voyez, SIRE, ce qui est iuste, voyez ce qui est utile à vous, à vostre posterité, à vostre Estat: n'ayez autre visée.

Il est iuste, SIRE, que les Arrests de vostre Parlement, de vostre grand Parlement, du Parlement de France, soient executez en France. En cela gist la principale force de vostre Estat. Qui est donc celuy qui vous conseille, SIRE, de vous couper vostre bras droit à vous-mesmes? En effect, sous noms empruntez, c'est le Roy Philippes qui le desire, qui le poursuit, qui le veut. Il est vostre frere, ie le sçay bien; mais il a un conseil dangereux. Il est ieune, il est ambitieux, il est grand; il sçait qu'il retient iniustement l'heritage de la Royne Catherine; que ce vera rongé l'esprit de son pere au

liet de la mort. De son viuant il se flattoit sur
la puissance de Iules: mais quand l'apprehen-
sion d'aller comparoir deuant le grand Mai-
stre, deuant le grand Iuge, luy a fait dresser les
cheueux en la teste; Alors les flatteries de son
Inquisition, les flatteries de ces Iesuites nel'ot
peu garantir contre sa propre science, contre
sa propre conscience: il a fallu parler, il a fallu
resister, & donner soulagement à certe inquiet-
tude, à ce flambeau, à ces gehennes. Mais tant
s'en faut que son fils vueille executer ce testa-
ment, qu'au contraire il a des desseins infinis,
incroyables: La seule France luy en arreste le
cours. Quel aduantage luy seroit-ce d'auoir
tousiours dans les entrailles de ce grand Roy-
aume, des personnes si affidez, si prompts & de-
terminez pour executer tout ce qu'il scauroit
souhaitter quelque perilleux qu'il soit? Quel
aduantage d'y auoir des espions si vigilans, si
hardis, & tellement cogneus pour secrets, que
quiconque voudra conspirer contre l'Estat,
soit François, soit Estranger, ne craindra ia-
mais de s'adresser à eux. Dans les autres Com-
munautéz on pourroit prendre l'un pour l'aut-
re, & se perdre. Ainsi fit Barriere: s'il ne se fust
decelé qu'à Iesuites, vous estiez sans doute
surpris. Que firent iamais rien de semblable,
les Templiers en France: les Humiliez en Ita-
lie: les Cordeliers Conuentuels en Espagnè?
La puissance des Rois est infinie, ie le confesse:
mais c'est pourueu qu'elle soit accompagnée
de prudence (la maistresse vertu des Princes.)
Quand les grâdes fautes sont faites, il est bien
difficile, & souuent impossible de les reparer.

Qui pensez-vous, SIRE, qui vueille plus rien
entreprendre contr'eux, quoy qu'ils machi-
nent contre vostre estat, contre vostre person-
ne? qui vueille plus estre partie, qui vueille plus
estre tesmoin, qui vueille plus estre iuge? SIRE,
pour vne premiere fois il se trouue des hom-
mes qui s'opposent aux meschans? mais quād
ils voyent les serpens à l'entour de leurs mai-
sons, qu'ils viendront vn iour deuorer leurs
enfans; cela fait desesperer tout le monde, ce-
la fait du tout perdre courage. Et apres petit à
petit chacun plie, chacun s'accommode (ô le
dangereux mot pour les Rois.) Si le feu Roy
estoit encores au monde, il en pourroit parler:
Ce grand defaut l'a mis où il est. Faictes vostre
profit, SIRE, de son exemple; faictes l'enco-
res de celuy de vos voisins: voyez si iamais
Charles le Quint, ny son fils, ces grands poli-
tics, ces grands rusez en matiere d'Estat, on
laisse affoiblir, ont laisse estonner leurs serui-
teurs? Voyez si iamais ils leur ont donné sub-
iect d'aller rechercher la grace de ceux qu'ils
auoiēt irrité pour le bien de leur Estat? Voiez
si iamais ils ont receu des gens qui leur peuf-
sent estre suspects? Quand vostre Majesté ne
confidereroit que la premiere institution des
Iesuites, leur source, leur progres, le lieu dont
ils viennent, elle les deueroit auoir en abomi-
nation. Mais apres en auoir senty des effects si
horribles, tels que vos plus grands ennemis
les pouuoient desirer: & apres auoir esté de-
liuré de ceste dangereuse secte, de ceste dan-
gereuse faction par vn grand Arrest, quelle ap-
parence, quelle couleur de remettre vous-mes-
mes


mes les assassins dans vostre Estat, la sedition parmy vos subiects, les menees & les partialitez dans vos prouinces, qui ont plus veu de tranquillité depuis l'exil des Iesuites, qu'en trente ans auparauant?


DIEU ne veut point estre tenté. Il vous a par deux fois, SIRE, garenty de leur cousteau: Il vous a enuironné de tant de bons Prelats & Docteurs, de tant de sçauants & deuots Religieux de tous ordres, pleins de probité, de doctrine, d'obeissance, d'affection enuers vostre Majesté, mille fois plus propres pour l'exaltation de nostre Religion Catholique, que ceux qui sont infectez de cette dangereuse heresie, qui a pour fondement, LE POUVOIR DE CHANGER LES ROYAUMES, LES OSTER A L'VN, ET LES DONNER A L'AUTRE. Pourquoi voulez-vous mespriser la grace que sa diuine bonté vous a faicte, vous tirant du cercueil & des bras de la mort? Mort par eux desirée, souhaitée, brassée; voulant enterrer la France avec ses deux derniers Rois dans vn mesme cercueil? Ne craignez-vous point, SIRE, de courroucer celuy, qui veut estre admiré en sa prouidence, & remercié en sa bonté & protection? Doutez-vous qu'il n'ait presidé au milieu de cette grande Compagnie, au milieu de ce grand Parlement, le plus auguste du monde, deliberant pour affaires concernans la vie de leur Prince, & la conseruation de son Estat? Quoy? voulez-vous casser cet arrest? Hé que sçauiez-vous, SIRE, s'il est cause que vous estes encorés en vie? Que sçauiez-vous


si Dieu s'est seruy de ce moyen pour vous con-
seruer en ce monde ! S'il s'est seruy de ce ram-
part contre leurs assaults ? Pouuez-vous ap-
profondir ses iugemens & ses secrets ? Ne sça-
uez-vous pas que ce sont des abysses ?

C E V G R A N D D I E U, qui d'enhaut co-
gnoist les feintises, les hypocrisies, le venin
que couuent les Iesuites dans leur estomac :
Ce grand Dieu, qui sçait leur dessein perpe-
tuel, essentiel, radiqué dans leurs veines, qui
est d'abattre la gloire de cette Couronne &
de cette Monarchie ; Vous face la grace, **SIRE**,
de bien discerner les amis d'Alexandre, d'auec
les amis des Iesuites. Et en commandant l'e-
xecution entiere de vostre grand Arrest, faire
cognoistre à toute la Chrestienté, que vous
vous sçatez aussi bien & prudemment garen-
tir des ruses, des artifices, & des mines secret-
tes de vos ennemis, que rompre, dissiper, &
perdre courageusement leurs armées, & leurs
forces ouuertes.

F I







2
c
d
e
f
g
h
i
k
l
m
n
o
p
q
r
s
t
u
v
w
x
y
z

